

Ī nyúucarij ti jaxaj je'ej ti i Jesús tyi'tíj tyaataséjratyej a'íjci i Juan

Ī nyúucarij ti jin uhuatyóochej

¹ A'íi pu a'ín pué'een i nyúucarij i Dios ti jaaté'exaa a'íjci i Jesús ti ajta Ciríistu' pué'een, ta'aj ij i Ciríistu' huo'taséjratye'en a'ímaj i maj jahuiire', je'ej ti jiye'tzín atyojo're'nyesij. Ciríistu' pu'ij séej jo'ta'ítyaca' i ti tajapúa tyí'huíire', tí'ij jaataséjratye'en a'íjci i Juan,

² a'íi pu'ij já'mua'ixaatye' i nyúucarij ti a'yan tyi'ja'yájna, ajta tyámua' tyá'mua'reej a'íjci i nyúucarij ti Dios jimi já'ma'can, a'íjna jime' je'ej ti huaríj i Jesús ti ajta Ciríistu' pué'een.

³ Che' huatóotyamua've'en a'íjna i ti huá'ixaatye' i nyúucaria'ra' i Dios, miche' majta huatóotyamua've'en i maj janamuaaj, majta ja'tzaahuatye' a'íjci i nyúucarij, jí'nye pu'rij tin a'ájna atyojo're'nyesij tí'ij a'yan tye'mej je'ej ti tyé'yu'si' a'íjci jitze i yu'xarij.

Juan pu hua'tyojtye' a'íjma i maj jusi'rii i tyeyúuj tzajta' ti aráahua'puaj tya'rá'asej

⁴ Nyáaj i nyaj Juan pué'een, nyáaj nu já'muatyojtye' mu siaj arahua'puaquej jusi'rii a'áa ti huataca'aj a Asia. Siata'aj ja'ancuriá'an i ti jin tyámua' tyajamuaatá', ajta jamuaatyápua'ritye'en i ja'mua tzajta', a'íjna ti

jájcuaj imuáj séjria'ca'aj, ti ajta ijíj séjre', ajta jusén jin séeria'aj ta'mej, miche' majta tyámua' jamuáa'uurej i júuricamej i maj aráahua'puaj ará'asej i maj a'áa já'sejre' jo'tij i Dios jo'tyájcaj i ipuárij japua,

⁵ che' ajta a'ín tyámua' tyajamuáacha'ín a'íjna i Jesús ti ajta Ciríistu' pué'een, i ti néijmi'i jin tyámua' een, ajta a'ín pué'een i ti anaqueej huatájuuriaca', ajta a'íjna jin antyúumua'reej ti tyihuo'ta'íjtye'en néijmi'caa i maj tyityatatyíj íiyan i cháanacaj japua. Ciríistu' pu taxie've', ajta juxúure' jin tyu'nájchitaca' ti'ij tajapuá huatányuunyij i tyaj jin ootyá'ítzee i Dios jimi,

⁶ a'íi pu taatá' tyej tyij jamuán tyu'ta'íjtaj, ajta ta'antyíhuo tyej tyij tyu'tyáhuire'en a'íjci jimi i Dios ra', i ti ajta jajvástara'. Che' a'ín huápu'i'ij naa huasé'rihua'an, ajta néijmi'i jin tyu'ta'íjtaj jusén jime'. Che' a'yan tyá'ra'nyij.

⁷ Ciríistu' pu jéetirij jitze aje'cáamej. Néijmi'i mu jaséjran, a'íi mu majta jaséjran i maj jaajé'caj, majta néijmi'i i tyeítyee mati'ij mana'aj pua'máj a'yan séjre' i cháanacaj japua, a'íi mu juyiinyen mati'ij jaaséj. Che' a'yan tyá'ra'nyij.

⁸ “Nyáaj nu a'ín pué'een i ta'nájcaj, nyajta i tu'vé'tyajtij”, a'yaa pu tyí'xaj a'íjna i tavástara', ti ajta Dios pué'een i ti néijmi'i putyí'uurej, i ti ajta jájcuaj imuáj séjria'ca'aj, ajta i ti jusén jin séeria'aj ja'mej.

Juan pu jaaséj a'íjci i Ciríistu'

⁹ Nyajta nyáaj Juan, i nyaj já'mua'ihuaara' pué'een, nyajta nu jimi séjre' i Jesús a'íj nu jin nyajta ja'mua jamuán tyu'ta'íjtaj i

Dios jimi, nyajta ja'mua jamuán jajpuéetzij na'mej tyej tyij néijmi'i jin tyo'táviicue'. A'yaa nu tyihuó'ixaaaj i nyúucaria'ra' i Dios, nyajta jaaxájtaca' je'ej ti huaríj i Jesús, a'íj nu nyij jin a'áa já'nami'huaca'aj jo'tíj ja'ráahuachij a jáata' ti a'yan tyaja'rájtyapuaj tíjin Patmos.

¹⁰ Tí'íj a'ájna putyí'rijcaa mati'ij pua'aj jana'michej i tavástara', a'íi pu i júuricama'ra' i Dios a'yan rájve nyéetzij jimi, nyati'ij nyij jáanamujri' ti nyahuárita' a'tíj ca'nyíin jin naatajé, a'yaa pu namuajria'ca'aj tí'ij tipua'aj a'tíj ucáajijhua i a'huáj jitze,

¹¹ a'yaa pu tyí'nye'ixaatya'ca'aj tíjin:

—Ootyéeyu'xaj i yu'xarij jitze je'ej paj tyi'tíj tyí'sej, pajta je'en huo'ta'ítyi' i maj arahua'puaquej jusi'rii i Dios jimi, a'áa ti huataca'aj a Asia, a'ájna a Éfeso, Esmirna, Pérgamo, Tiatira, Sardis, Filadelfia, ajta a'ájna a Laodicea.

¹² Nyati'ij nyij ooré'nyeeriaca' nyej nyij jaaséej a'tíj ti tyí'nye'ixaatya'ca'aj, nyati'ij a'yan huaríj aj nu nyij arahua'puácaa huaséj i cantyíij ti japuan antyítaa á'yi'ij, ajta ooroj jin taavijhuaca'aj,

¹³ ajta a'ájna jé'ta' jo'tíj ja'antytátzajmee, sñij pu a'áa huatyávaaca'aj ti a'yan huasé'rihua'aj tí'ij tyéviij, a'yaa pu eenye' tyi'tyéchajca'aj cáanarij jime' ti títi'ij, ajta puásij jin ahuóoji'ca'ca'aj ti ooroj jin taavijhua.

¹⁴ Cuéeinavi'can pu cácipuaca'aj, tí'ij muxáj a'yájna tí'ij ajta huasé'rin i séerij, ajta i jí'sáara' a'yaa pu huasé'rihua'aj tí'ij tiéj.

¹⁵ Ajta i icájra'an a'yaa pu huasé'rihua'aj

ti'ij tyi'tíj ti me'estíj, huápu'i'ij pu naa tyi'tyama'astáji'caa, ajta ti'ij tyi'xajtaca'aj, a'yaa pu namuajria'ca'aj ti'ij jo'tíj ja'ancáamu'yej ti tyájujhua'naj ca'nyíin jime'.

¹⁶ Ajta i jumuáca'ta' pujmua' pu arahua'puácaa i xú'ra'vej iityáaca'aj, ajta i tyényi'tze' pu éejnyinyiica'aj i chúun ti huápu'i'ij tyí'itzij ajta juxa'aj tya'antámuamuaa. Ajta i nyéerima'ra' a'yaa pu tyá'taaca'aj ti'ij i xicáj ti néijmi'i jin eeráxirej.

¹⁷ Nyati'ij jaaséej, aj nu nyij arájvej jo'tíj ja'ra'íicajmee, ya cuxáa naamuí'. Aj pu'ij a'íin na'ajtamuáriej i jumuáca'ta' ti pujmua' jime' i jumuáca', ajta a'yan tyinaaté'exaaj tijn:

—Capáj tyi'tziinye'ej, nyáaj nu a'íin pué'een i nyaj anájcaj, ajta i nyaj uvé'tyajtij,

¹⁸ nyajta a'íin pué'een i nyaj júurij. Nyáaj nu huámu'i'ijcaa, nyajta ijíj nu jusén jime' júurij. Nyáaj nu a'íjna jin antyínyamua'ree nyaj hue'tyáanaj jo'maj já'cui'nyij, na'ríij nyaj hui'rátóonyij.

¹⁹ Ootyéeyu'xaj i paj períj jaaséej, je'ej ti ijíj tyi'tíj tyí'sejre' ajta je'ej ti tye'mej majca'huáyee.

²⁰ A'yaa pu huatóomua'aj je'ej paj tyi'tíj tyu'séj, i xú'ra'vetyee i maj aráahua'puaj ará'asej i paj huo'séj i nyaj hui'tyáaca'aj nyamuáca'ta' pujmua', ajta a'íjna i ti aráahua'puaj ará'asej i ti cantyíj jitzán antyítaa á'yi'ij ti ajta ooroj jin taavijhua: I xú'ra'vetyee i maj aráahua'puaj ará'asej, a'íi mu a'íin pué'een i maj tajapúa tyí'huüre' majta a'íjna jin antyúumua'reej mej mij huó'cha'íin i maj jusi'rii i tyeyúuj tzajta',

ajta i ti aráahua'puaj ará'asej i ti jitzán i cantyíij antyítaa á'yi'ij, a'íi pu a'íin tyi'pué'een i tyeyúuj aráahua'puaj ti tya'rá'asej.

2

I nyúucarij ti huata'ítayi'huaca' a'íjma jimi i maj Éfeso jóosi'rii

¹ 'Pata'aj a'yan tyaata'ítayi' a'íjci i ti a'íjna jin antyúumua'reej ti huó'cha'íin a'íimaj i maj a'áa jóosi'rii a Éfeso ti jime' yee: “A'yaa pu tyí'xaj a'íjna i ti hui'tyáa' i jumuáca'ta' pujmua' i xú'ra'vetyee i maj aráahua'puaj ará'asej, ajta a'áa ja'yi'vej jo'tij ja'antyítaatimee i ti ooroj jin taavijhua.

² Nyáaj nu néijmi'i mua'reej je'ej siaj tyityetyúucha'ij, nyáamua'ree siaj jéehua tyí'muarie' siajta jéehua á'viicue're', siajta quee hua'xie've' i maj je'ej pua'aj tyityetyúucha'ij. Siajta seríj huo'mua'aj i maj a'yan tyúusejrataca'aj maj a'íin pué'een i Dios ti hua'antyíhuoj, ma' ajta quee camu a'íin pué'een, a'yaa xu sij tyihuo'taséjrataca' maj a'íin pué'een i maj tyí'hue'tacaa.

³ Jéehua xu jajxié'vi'ra'aj siaj sij néijmi'i jin tyo'táviicue', siajta a'íjna jin jajpuéetzij, nyejitzé ma'can.

⁴ Nyajta nyáaj nu jamuaeté'exaatye'ej i siaj jin ootyá'itzeerej nyéetzij jimi, a'íjna jime' siaj quee che' a'yan tyí'nyaxie've' siatí'ij anaquéej tyí'nyaxie'va'ca'aj.

⁵ A'íj xu jin jo'támua'reej jo'siaj tyi'tíj jin jo'tyá'itzee nye jimi, siajta seequéj tyú'mua'tyij,

a'yájna siati'ij anaquéej tyityetyúucha'íica'aj. Ajta tìpua'aj sequée a'yan huárinyij, nyáaj nu ja'mua jimi jo'ma'aj na'mej, nyej nyij jamuá'ari' a'íjna i ti antyitátzaj i ti ja'mua jimi séejre', a'yaa nu rinyij tìpua'aj sequée seequéj tyú'mua'tyij i Dios jimi.

⁶ Maj siajta mua'aj, xá'puí' xu ricij a'íjna jìme' siaj quee jaxie've' je'ej maj ricij a'íimaj i maj a'yan hua'tamuá'muaj tìjin nicolaítas, i nyaj nyajta quee nyáaj hua'xie've'.

⁷ A'íjna i ti iityánamuaj, che' jáanamuj je'ej tì i júuricama'ra' i Dios tyihuá'ixaatye' a'íimaj i maj jusi'rii i Dios jimi. A'íimaj i maj néijmi'i jin tyu'tyámue'tin, a'yaa nu tyihuo'tá'sij maj jáacua'nyij a'íjna jitze tì séejre' i ciyéj tì jin júurij tá'ra'nyij, a'áa tì ja'távej jo'tij huápuí'ij naa jo'éen i Dios jimi.”

I nyúucarij ti huata'ítyi'huaca' a'íimaj jimi i maj Esmirna jóosi'rii

⁸ 'Pata'aj a'yan tyaata'ítyi' a'íjci i ti a'íjna jin antyúumua'reej tì huó'cha'íin a'íimaj i maj a'áa jóosi'rii a Esmirna tì jìme' yee: “A'yaa pu tyí'xaj a'íjna i ti a'nájca, tì ajta a'íi pué'een i tu've'tyajtij, a'íjna i ti huamuí' ajta je'en huatájuuriaca'.

⁹ Nyáaj nu jamua'reej siaj jajpuéjtzij, siajta quee je'ej tyéejviicue', maj siajta mua'aj nyéetzij jimi xu chíjtyaanyi'ij pué'een. Nyáaj nu jamua'reej maj je'ej pua'aj tyaja'muaxaj, a'íimaj i maj a'yan tyúusejrataj maj a'íjci jitze ajtyáma'can i Israel, ajta capu a'yan tyi'ja'yájna, sulu a'íi mu a'íin pué'een i tyiyáaru' maj jimi jusi'rii.

10 Caxu tyí'tziinye'ej je'ej siaj tya'ajpuéetzij xá'ju'un, ji'nye a'íjna i tyiyáaru', a'íi pu séecan mua'ajmaj jamue'tyánasij, a'yaa pu'ij néijmi'caa tyajamuaatyésejra tipua'aj sianá'astijre'ej nusu sequée, siajta tamuáamuata' xicáj jajpuéetzij xá'ju'un. Tyámua' xu néijmi'i jin eenye' siajta tyo'táviicue' nyéetzij jimi, tipua'aj majamuáacui'nyij, nyáaj nu jamuaatí'tye'sij i cúruun i siaj jin júurij xá'ju'un jusén jime'.

11 A'íjna i ti iityánamuaj, che' tyámua' tyáanamuj je'ej ti i júuricama'ra' i Dios tyihuá'ixaaty'e' a'íimaj i maj jusi'rii i tyeyúuj tzajta': Majta a'íimaj i maj néijmi'i jin tyu'tyámue'tin, capu huá'ci'tyij maj jajpuéetzij muá'ra'nyij mati'ij a'íimaj i maj majtáhua'aj cui'nyij."

I nyúucarij ti huata'ityi'huaca' a'íimaj jimi i maj Pérgamo jóosi'rii

12 'Pata'aj pajta tyaata'ityi' a'íjci i ti a'íjna jin antyúumua'reej ti'ij huó'cha'íin a'íjma i maj a'áa jóosi'rii a Pérgamo ti jime' yee: "A'yaa pu tyí'xaj a'íjna i ti ji'tyéechuij i chúun ti juxa'aj tya'antámuamuaa.

13 Nyáaj nu jamua'reej siaj a'áa jo'cháatimee jo'tij tyejé'ijtaj a'íjna i tyiyáaru', siajta mua'aj síoche' xu ná'astijre' nyéetzij. Caxu jaatáxaahuataca' siaj nyéetzij ná'tzaahuaty'e', caxu siajta a'ájna xicáara' jitze ti'ij a'íin séjria'ca'aj i Antipas, ti tyámua' éenye'ej nyéetzij jimi, a'íi mu jaajé'caj a'ájna jo'tij tyejé'ijtaj i tyiyáaru'.

14 Maj siajta mua'aj, tyi'tj xu jin ootyá'itzeerej nye jimi, a'íi mu ja'mua jimi séejre' i maj ja'astej

a'íjci i nyúucarij i ti jin tyihuá'mua'tyej a'íjna i Balaam, i ti ajta a'yan tyaamuá'tyej a'íjci i Balac ti'ij hue'tzij jin huo'mué'tij a'íimaj i maj Israel jitze ajtyáma'can, mej mij tyú'cua'nyij i cue'ráj i maj tyu'támu'vejritaca' a'íjma jimi i sáanturij, ajta mej mij huóoxana'cire'en.

¹⁵ A'íi mu majta ja'mua jimi séejre' i maj quee jaxie've' maj ajtáciiñyej a'íjna jitze i huá'yi'raj i maj a'yan hua'tamuá'muaj tijin nicolaítas.

¹⁶ A'íj xu jin siata'aj siajtáhua'aj ja'antzaahuatye'en i Dios, na'riij sequée a'yan huárinyij, nyáaj nu ja'mua jimi ja'tanyésij, nyej nyij huo'tanyó'si'tye'en a'íimaj a'íjna jime' i chúun ti nye tyenyij jitze éejnyinyii.

¹⁷ Ajta a'íjna i ti iityánamuaj, che' tyámua' tyáanamuj je'ej ti i júuricama'ra' i Dios tyihuá'ixaatye' a'íimaj i maj jusi'rii i tyeyúuj tzajta'. Majta i maj tyu'mué'tin, a'yaa nu tyihuo'tá'sij mej mij jáacua'nyij i cue'ráj ti jútye' já'ma'can, nyajta nu tyetyéj jaatátistej ti cuéeinara', i ti jitzán á'yu'si'ij je'ej ti a'íin jájcuan arí ántyapuaj, ajta quee a'tíj jamua'ree je'ej ti tyé'yu'si', sulu a'íi pu'uj i a'tíj jamua'reej i nyaj jaatátistej a'íjci i tyetyéj."

I nyúucarij ti huata'ityi'huaca' a'íimaj jimi i maj Tiatira jóosi'rii

¹⁸ 'Pata'aj pajta a'yan tyaata'ityi' a'íjci i ti a'íjna jin antyúumua'reej ti huó'cha'íin a'íimaj i maj a'áa jóosi'rii a Tiatira ti jime' yee: "A'yaa pu tyí'xaj i yójra' i Dios, i ti ajta a'yan eenye' ava'jì'síjmeé ti'ij tiéj ti atyúumemej,

ajta me'estícan iira'íicajmee tí'ij coobre maj jacámejri':

19 Nyáaj nu néijmi'i mua'reej je'ej siaj tyi'tíj jin ricij; nyáamua'ree siaj tyámua' tyúuxie've' síj ajta síj, i siaj jitzán tyá'tzaahuatye', siajta huá'huiire' i séecan néijmi'i jin setye'víicue'raj, siajta ijíj, jéetze' xu seríj tyámua' ricij sequée anaquéej.

20 Ajta a'íi pu quee na'ráanajchij siaj tzáahuatyira'aj jimi: tyícha'íj a'íjci i íitaj tí a'yan ántyapuj tíjin Jezabel, i tí a'yan tyúuxaj tí i Dios jitze ma'can tyí'xaj, a'íi pu'ij hue'tzij jin tyihuá'mua'tyej i maj nye jimi séejre', mej mij huóoxana'cire'en, majta tyú'cua'nyij i cue'ráj i maj tyu'támu'vejritaca' a'íimaj jimi i sáanturij.

21 Nu'ríj jaatá' tí'ij tyá'antzaahuatye'en i Dios jimi, ajta a'íin capu jaxie've' tí a'yan huárinyij: capu ajta jaxie've' tí jaatapuá'citaj i tí jime' juxana'cire'.

22 A'íj nu jin a'áan yó'ojrasij utáatzij japua, nyajta a'íimaj i maj jamuán tyu'xána'cirej, aj nu nyij jéehua huápuí'ij puéjtzij huo'tá'sij tipua'aj mequee jaatapuá'citaj i maj je'ej jin pua'aj ricij.

23 Nyajta huá'cui'nyij i yójmua'mua' i íiti', a'yaa mu mij néijmi'i i maj jusi'rii i Dios jimi tyá'mua'reeren nyaj a'íin pué'een i tí jú'mua'ree je'ej tí a'tíj tyí'mua'tzej i jutzájta', nyajta a'yan tyihuo'tá'sij séej nyajta séej je'ej tí tyi'tíj jin huaríj.

24 Siajta mua'aj mu séecan, mu siaj Tiatira ja'chej, i siaj quee já'astijre' a'íjci i nyúucarij tí hue'tzij pué'een, siajta quee jamua'reej i tí

jéehua huápu'i'ij juxie've' i tyiyáaru' jimi, a'yaa nu tyajá'mua'ixaatye' nyej quee che' tyi'táj jin tyajá'mua'ijcatye'en.

²⁵ Siata'aj tyámua' eenye' je'ej siaj tyi'táj jin ricij, 'asta nyana'aj quee nyajtáhua'aj ya'uvé'nyej.

²⁶ A'íimaj i maj tyu'tyámue'tin, majta móoj a'yan tyámua' tyityetyúucha'íij je'ej nyej nyáaj tyá'xie've', 'asta na'aj quee néijmi'i tye'entyipua'rej, nyáaj nu huo'ta'sij mej mij tyihuo'ta'íjtye'en a'íijma i maj séej chuég japua jo'cháatimee,

²⁷ ca'nyéjrij pu jin tyihuo'ta'íjtye'sij, a'yaa pu cha'taj na'aj tyihua'antypua'ritye'sij a'íijma i maj jájcha'íire' ti'ij a'táj ti jaatyáaaraxi'in i xá'rij ti xaríj jin taavijhua, a'yájna ti'ij ajta i nyavástara' nyéetzij tyinaa'íjcaj.

²⁸ Nyajta huo'ta'sij mej mij a'íimaj tátzave'ej muá'ra'nyij ti'ij i xú'ra'vej ti eeré'nyinyii tapuá'risima'caj.

²⁹ A'íjna i ti iityánamuaj, che' tyámua' tyáanamuj je'ej ti i júuricama'ra' i Dios tyihua'ixaatye' a'íimaj i maj jusi'rii i tyeyúuj tza-jta'."

3

I nyúucarij ti huata'ityi'huaca' a'íimaj jimi i maj Sardis jóosi'rii

¹ 'Pata'aj a'yan tyaata'ityi' a'íjci ti a'íjna jin antyúumua'reej ti huó'cha'íin a'íijma i maj a'áa jóosi'rii a Sardis ti jime' yee: "A'yaa pu tyí'xaj a'íjna i maj jitzán séejre' i júuricama'ra' i Dios

ì maj aráahua'puaj ará'asej, ti ajta hui'tyáa' ì xú'ra'vetyee ì maj aráahua'puaj ará'asej. Nyáaj nu jamua'reej je'ej siaj tyí'muarie', nyajta nu jamua'reej siaj seríj nye jimi mui'chij, tyij majta a'yan tyí'muaxaj yee sióoche' xu júurij.

² Siata'aj atanyéjnye'rej, siajta tyámua' tyú'uurej a'íjci ti óoj ja'mua jimi tyí'sejre', ajta arí tímua' tye'entyipúa'rij, ji'nye a'yaa pu tyí'muasej a'íjna je'ej siaj ricíj capu xá'puí' een ì Dios jimi.

³ Siata'aj jo'támua'reej je'ej maj tyajamuaa-muá'tyej ì siaj ja'ancuriáa', siata'aj a'yan huárinyij siajta je'en ì Dios jimi ajtyáhuiixi'in. Típua'aj sequée atanyéjnye'rej, nyáaj nu jo'ma'aj na'mej ja'mua jimi ti'ij náhua'rij, siajta mua'aj caxu jamua'reej a'tzáaj nyaj ja'mua jimi ja'tanyésij.

⁴ Séecan mu ja'mua jimi séejre' ì maj quee tyi'tíj jin á'itzeere' ì jutzájta', a'íi mu mij nyaj jamuán huací'ca'aj muá'ju'un cuéeinavi'metyu'cháaj, ji'nye a'yaa pu tyihua'tyévijtye' a'íjma.

⁵ A'íimaj ì maj tyu'tyámue'tin, a'yaa mu cuéeinavi'can tyi'cháaj muá'ju'un, nyajta quee jo'rio'uunaj je'ej ti ántyapuaaj ì yu'xarij jitze ì maj jitzán á'yu'si'ij a'íimaj ì maj jusén jin huatyá'itzeere'ej ì Dios jimi, sulu nyáaj nu huo'taxájta ì nyavástara' jimi, nyajta a'íjma jimi ì maj jimi tyí'huiire' ì nyavástara'.

⁶ Ajta a'íjna ì ti iityánamuaj, che' a'íin tyámua' tyáanamuj je'ej ti tyihuá'ixaatye' ì júuricama'ra' ì Dios a'íjma ì maj jusi'rii ì tyeyúuj tzajta'."

I nyúucarij ti huata'ityi'huaca' a'íjma jimi i maj Filadelfia jóosi'rii

⁷ 'Pata'aj a'yan tyaata'ityi' a'íjci i ti a'íjna jin antyúumua'reej ti'ij huó'cha'íin a'íjma i maj a'áa jóosi'rii a Filadelfia ti jime' yee: "A'yaa pu tyí'xaj a'íjna i tyámua' een ti ajta tzáahuatyi'ra'aj jin tyí'xaj, a'íi pu a'íjna jin antyúumua'reej ti huo'tá'an mej mij a'áa jo'tyájrutyey jo'tij já'sejre' a'íjna i ti jitzán eeráma'can i David, tipua'aj a'íin tya'antácuunaj, capu i'ríj ti a'tíj tye'tyáanaj, na'ríij a'íin tye'tyáanaj, capu ajta i'ríj ti'ij a'tíj tya'antácuunaj:

⁸ Nyáaj nu néijmi'i mua'reej je'ej siaj ricij, cási' xaaséj, nu'ríj tyajamua'antácuunyej siaj sij juxáahuaj utyájrutyey, ajta quee i'ríj ti a'tíj tye'tyáanaj, nyáaj nu jamua'reej tiquee jamú'ca'nyisti', siajta síooche' xu tyá'astijre' je'ej nyaj tyajamuáa'ixaa, caxu ná'xaahuaj.

⁹ A'yaa nu huá'uurej a'íjma i maj tyiyáaru' jimi jusi'rii, i maj tyí'hue'tacaa a'íjna jime' maj a'yan tyúusejrataj maj Israel jitze ajtyáma'can, a'yaa nu ca'nyéjrij jin huá'uurej mej mij mujo'vá'ju'un majta je'en tyítunutaxi'in ja'mua jimi, mej mij a'íjna jin jáamua'reej nyej nyáaj já'muaxie've'.

¹⁰ Xu'ríj ja'rá'astee je'ej nyaj tyajamuaata'íj a'íjna jime' siaj néijmi'i jin tyo'táviicue'ri', a'íj nu jin nyáaj ja'muacha'íij na'mej a'ájna xicáara' mati'ij néijmi'i jajpuéetzij muá'ju'un íiyan cháanacaj japua, mej mij jáamua'reej i maj a'yan huacháatimee.

¹¹ Jiye'tzín nu yava'cányesij. Tyámua' xu

néijmi'i jin eenye' je'ej siaj seríj tyu'muáriej, caxu tyi'tá'care'en tí'ij a'tíj jamuaanáhue' i siaj seríj jaamué'tíj.

¹² A'íimaj i maj tyu'tyáamue'tíj, a'yaa nu ty-ihuo'tá'sij mej mij tyityetya'úuj muá'ra'nyij u tyeyúuj tzajta' i nyaj Dios tí ja'a'rij, ajta quee che' a'náj iiráamej, a'íjma nu jitze jo'tyéyu'xaj je'ej tí ántyapuaaj i nyaj Dios, nyajta je'ej tí tyaja'rájtyapuaaj chájta'najra' i nyaj Dios, a'íjna i Jerusalén tí jájcuaj, tí ajta tajapuá je'cáanyej jo'tíj i nyaj Dios já'sejre', a'íjma nu nyajta jitze jo'tyéyu'xaj je'ej nyaj jájcuaj jin ántyapuaaj.

¹³ A'íjna i tí iityánamuaj, che' tyámua' tyáanamuaaj je'ej tí i júuricama'ra' i Dios tyi-huá'ixaatye' a'íjma i maj jusi'rii i tyeyúuj tza-jta'."

I nyúucarij tí huata'ítyi'huaca' a'íjma jimi i maj Laodicea jóosi'rii

¹⁴ 'Pata'aj a'yan tyaata'ítyi' a'íjci i tí a'íjna jin antyúumua'reej tí huó'cha'íin a'íimaj i maj a'áa jóosi'rii a Laodicea tí jime' yee: "A'yaa pu tyí'xaj a'íjna i tí tzáahuatyi'ra'aj jin tyí'xaj ajta néijmi'i tyámua' jin een, ajta a'íin pué'een i tí Dios jamuán néijmi'i tyú'taahuaca' tí'ij na'aj ijíj tí tyí'sejre':

¹⁵ Nyáaj nu néijmi'i mua'reej je'ej siaj tyi'tíj jin ricíj. Nyáamua'ree siaj quee ooca'nyáaj sianaataxie'vej nyéetzij, caxu siajta ca'nyéjrij jin ná'antzaahuaaj. A'yaa pu tyina'ráanajchi siaj ooca'nyáacan jin naa nyojo'mua'raj, na'riij sequée ca'nyéjrij jin ná'tzaahuatye'ej.

16 Siajta c̄ī siana'aj tyiná'tzaahuatye', caxu a'yan tyí'huire' ti'ij jájtyij ti jéehua pistij nusu ti jéehua cimujraa, a'ij nu jin a'yan já'mua'uurej nyej nyij ca'nyéjrij jin majamúuhua'xij.

17 A'yaa xu tyí'xaj siaj mua'aj chíjtyaanyi'ij pué'een, ti jee jéehua jamuáahuii, ti jee ajta quee tyi'tíj jamuá'itziitye', siajta mua'aj caxu jamua'reej siaj xána'visi', siajta je'ej pua'aj huá'sejratye' i tyeítyee, mua'aj xu quee je'ej tyéejviicue', xa'racúcu'nyijmee siajta muámua'vi'ijmee.

18 A'ij nu jin a'yan tyaja'muahuavij siaj nyéetzij jimi jáananan i ooroj ti tiéj jitze juta'huaca, siata'aj sij ji'réc̄an jime' huatyoochíjtyaanyi'taj, siajta nyéetzij jimi jáananan i cáanarij ti naa tyí'cueena siaj sij a'ijci ucóchejtya'xi'in ti'ij quee séejre' i ja'muatyévi'ij i siaj jatyevi'ra' a'ijci jime' siaj muámua'vi'ij, siajta nyéetzij jimi jáananan a'ijci i siaj aróhuatye'en i juji'ij jitze siata'aj sij atanyéjnye'rej.

19 A'yaa nu tyámua' tyihuá'ixaatye', nyajta puéjtzij hua'tá'caa a'ijjma i nyaj hua'xie've'. A'ij pu jin siata'aj seequéj tyú'mua'tyij, siajta ja'antzaahuatye'en i Dios.

20 Cási', nyáaj nu eetyéjvee a ti ja'pueertaj nyetye'ejtyato'xa'aj, tipua'aj a'tíj náanamuaaj ajta je'en tyina'antácuunye'en, aj nu nyij utyárutyij chí'ra'an tzajta' tyej tyij néemi'ij tyú'cua'nyij.

21 A'íimaj i maj tyu'tyámue'tij, a'yaa nu tyihuo'tá'sij maj nyajamuan oorá'sej jó'nyaj tyejé'ijtaj, a'yájna nyati'ij nyáaj tyu'tyámue'tij,

aj nu nyij nyavástara' jamuán huatyéeyixij jo'tij a'ín tyejé'ijtaj.

22 Ajta a'íjna i ti iityánamuaj, che' tyámua' tyáanamuj je'ej ti i júuricama'ra' i Dios tyi-huá'ixaatye' a'íjma i maj jusi'rii i tyeyúuj tza-jta'."

4

Juan pu huo'séj i maj janajchej i Dios u tajapuá

1 Ti'ij a'yan tye'entyipua'rej, aj nu nyij ájnyeeriaca', nyati'ij nyij jaaséj i puéertaj ti antácuunyica'aj u tajapuá, ajta i nyaj anaquéej jáanamujri' i ti naatajé ti ajta a'yan namuajria'ca'aj ti'ij a'tíj ti ucáajijhua i trompéetaj jitze, a'yaa pu tyinaaté'exaaj tijin:

—Mujo'té'yi'ij nyata'aj muaataséjratye'en je'ej ti tyi'tíj tyúuxie've' ti a'yan huárinyij majca'huáye.

2 Aj pu'ij i júuricama'ra' i Dios nye jimi huatyá'itzee, nyajta je'en ipuárij huaséj ti ujo'tyávaaca'aj u tajapuá, ajta a'tíj jitzán huatyácatyii.

3 Ajta a'íjna i ti acájca, a'yaa pu huasé'rihua'aj ti'ij tyetyéj ti huápu'i'ij tyá'najchij ti po'vij ajta ti tyóomuaa á'naxcaj, ajta a'yan huasé'rihua'aj ti'ij síj i tyetyéj ti po'vi'ij jin naa tyí'me'estij, ajta cu'xa'aj atahuíjca'aj jo'tij jo'tyávaaca'aj i ipuárij, ti tyama'astáji'caa huá'ravi'can jime' a'yájna ti'ij i tyetyéj i maj a'yan jatamuá'muaj tijin esmeralda,

4 ajtáhua'aj pu séecan i ipuárij tya'taváatima'caa jo'tij jo'tyéjvee a'íjna i ipuárij

seityéj japuan muáacuaj pu tya'rá'axcaa, majta i huáasij acatyé'tya'ajma'caa i ipuárij jitze, cuéeinavi' mu tyí'chajcaa, majta cúruun tyo'carújtya'ajma'caa i jumu'új jitze ooroj ti jin tyí'taavijhua.

⁵ Ajta a'íjna jitze i ipuárij a'yaa mu tyityetyána'axcava'ra'aj majta tyényuuca'aj, ajta a'ájna i ipuárij ti jo'tyéjvee, tatzárij pu aráahua'puaj ataváatima'caa, ajta a'íjna i tatzárij a'íi pu a'íin pué'een i júuricama'ra' i Dios ti aráahua'puaj ará'asej.

⁶ A'ájna jo'tij jo'tyéjvee a'íjna i ipuárij, a'yaa pu éenye'ej huariá'muanyica'aj a chóota' tí'ij tyi'tíj ti naa tyí'me'estij ti ajta tátzaj.

Ajta a'ájna jé'ta', jo'tij jo'tyéjvee a'íjna i ipuárij, muáacuaj mu i maj júurij ataváatima'caa, majta jéehua jí'síj hua' jitze séjria'ca'aj, i hua' nyéerimij jitze ajta hua'huarita'.

⁷ Ajta i ti anájcaj a'yaa pu huasé'rihua'aj tí'ij muájyej, ajta i ti je'tyáa'sej, a'yaa pu huasé'rihua'aj tí'ij túuru', ajtáhua'aj i síj ti je'tyáa'sej, a'yaa pu tya'cányeerica'aj tí'ij tyévij, ajta i tu've'tyajtíj, a'yaa pu huasé'rihua'aj tí'ij cué'ra'vej ti huatará'raj.

⁸ Majta a'íimaj i maj muáacuaj i maj júurij, a'íi mu aráseej pua'mácan ajta anájma'caaj síj ajta síj, ajta jéehua jí'síj jitzán séjria'ca'aj, jéjre' ajta tyétye'. A'náj tina'aj mu a'yan tyí'xajtaca'aj majta a'yan tyí'chuiicaca'aj tíjin:

Tyámua' pu een, tyámua' pu een, tyámua' pu een
i tavástara',

Dios pu a'ín pu'éen i ti néijmi'i jin an-tyúumua'reej,

a'íi pu anaquéej séjria'ca'aj, ajta ijíj séejre', ajta jusén jin séeria'aj ta'mej.

⁹ Ajta mati'ijta a'íimaj janajchej i maj muáacuaj, majta tyé'tyojtzi're'ej a'íjci i ti ipuárij jitze acájca, i ti jusén jime' júurij,

¹⁰ a'íimaj i huásij i maj seityéj japuan muáacuaj ará'asej, a'íi mu tyítunutaxij a'íjci jimi i ti ipuárij jitze acájca, majta jaatyánajchij, majta tyu'tátuiire'sij a'íjci jimi i tyuucúrun, majta a'yan tyí'xajtaca'aj tijin:

¹¹ A'yaa pu tyimuaavíjtye' muéetzij, mu paj tavástara' pu'éen, pajta taj Dios pu'éen, tyej tyij tyimuaatatyójtzi're'en, tyajta muatyánajchej i paj jin néijmi'i putyí'uurej,

ji'nye muáaj paj néijmi'i tyú'taahuaca', i ti a'yan tyí'sejre',

muáaj paj a'yan tya'ajxié'vi'raca'aj a'íj pu jin néijmi'i tyú'taavijhuaca'.

5

I yu'xarij ti jiri' ti jitzán tyé'yu'si' ajta i cánya'aj

¹ Ajta a'íjna i ti acájca i ipuárij jitze, jumúaca'ta' pujmua' pu ji'tyépijca'aj i yu'xarij ti juxa'aj tyé'yu'si'huaca'aj, ajta arahua'puaquej pu ájvi'tyijhuaca'aj i xíjca jime'.

² Nyajta séej huaséj i tajapuá ti tyí'huiire', a'yaa pu'ij ca'nyíin jin tyu'ta'íhuoj tijin:

—¿A'tanyíj quee tyi'tíj jin á'itzeere' tí'ij ja'ajsújtza'naxi'in i ti ajvi'tyíihuajmee, ajta je'en jaatáxijta i yu'xarij?

³ Ajta u jútye', ajta íiyan i cháanacaj japua, ajta jityán i cháanacaj, capu a'tíj a'yan tyu'tóoci'puaj tí'ij jaatáxijta, ajta jaaséj je'ej tí tyé'yu'si'huaca'aj.

⁴ Nyajta nyáaj jéehua nu huápuí'ij nyeyiinyaca'aj a'íjna jime' maj quee jáatyoy síj tí a'yan tyu'tóoci'puaj tí'ij jaatáxijta i yu'xarij nusu tí jaaséj je'ej tí tyé'yu'si'.

⁵ Tí'quij síj tí hua' jitze ajtyáma'can a'íimaj i huásasij, a'yaa pu tyinaaté'exaaj tíjin:

—Capáj ayiinyaj, jí'nye a'íjna i maj a'yan jatamuá'muaj tíjin i Muájyej i tí hua' jitze ajtyáma'can a'íimaj i maj Israel jitze eeráanyej, a'íjna i tí David jitze eeráma'can, a'íi pu arí tyu'tyáamue'tij a'íi pu pújoorej tí'ij ja'ajsújtza'naxi'in i ta'raahua'puácaa tí jin ajvi'tyíihuajmee ajta je'en jaatáxijta i yu'xarij.

⁶ Aj nu nyij cánya'aj huaséj a'ájna jé'ta' jo'tij jo'tyéjvee a'íjna i ipuárij, ajta jé'ta' a'íjma jimi i maj muáacuaj i maj júurij, ajta jé'ta' a'íjma jimi i huásasij, a'yaa pu huasé'rihua'aj cuxáa meríj jaajé'cataca'aj. Ajta arahua'puácaa ava'ahuájma'caa, ajta arahua'puácaa ava'jí'síjma'caa, ajta i jí'sáara' i ta'ráahua'puaj, a'íi pu a'íin pué'een i júuricama'ra' i Dios i tí a'yan yo'ta'ítyaca' íiyan cháanacaj japua.

⁷ A'íjna i cánya'aj, a'íi pu ja'ancuré'pij a'íjci i yu'xarij i tí muáca'ta' pujmua' séjria'ca'aj a'íjna i tí ipuárij jitze acájca,

⁸ ti'ij ja'ancuré'pij a'íjci i yu'xarij, a'íimaj i maj muáacuaj i maj júurij, majta i huásij i maj seityéj japuan muáacuaj ará'asej, a'íi mu néijmi'i ecóotutaxij a'íjci jimi i cánya'aj. Néijmi'i mu a'íimaj i áarpaj tyi'tyéi'ca'aj, majta túxa'aj ooroj ti jin tyí'taavijhuaca'aj, ajta cuáanye'ej ava'jistíjma'caa a'íjci jitze i túxa'aj, a'íi pu'ij a'íin pué'een i maj jin jahuooca'aj a'íimaj i maj tyeítyeristyamua'mua' pué'een i Dios.

⁹ Majta jájcuan jin a'yan tyí'chuiicaca'aj tijin: Muáaj paj ji'réenye'ej séejre' pej pij ja'ancuré'pij i yu'xarij pajta ja'ajsújtza'naxi'in i ti ajvi'tyíihuajmee, ji'nye muáaj paj huatámu'vejrityi'huaca', pajta a'íjci jime' a' xuure' tyu'nájchitaca' i Dios jimi, néijmi'caa jitze ma'can i tyeítyee, i maj séej jitze maj eeráma'can, i maj séej nyúucarij jin tyí'xaj, nusu i maj séej chuéj japua já'ma'can.

¹⁰ Pajta tyámua' huó'ruuj mej mij síj mana'aj tyeítyeera' pué'eenye'ej muá'ra'nyij, mej mij majta tyu'tyáhuire'en a'íjna jimi i Dios, majta a'íimaj mu tyu'ta'íjtaj íiyan i cháanacaj japua.

¹¹ Aj nu nyij atányeeriaca', nyajta je'en mui'caa huánamuajri' i maj tajapua tyí'huire' i maj a'áa ja'taváatima'caa jo'tij jo'tyéjvee i ipuárij, jo'maj majta já'sejria'ca'aj i maj muáacuaj i maj júurij, majta a'íijma jimi i huásij. A'íi mu huápu'i'ij mui'caa, capu ámiteeria'ca'aj a'chu maj pua'maca'aj,

12 a'yaa mu mij ca'nyíin jin tyí'xajtaca'aj tijin:
 A'íjna i cánya'aj i ti huatámu'vejritiyi'huaca',
 a'yaa pu tye'tyévijtye'
 ti a'íin ja'ancuriá'an i ti néijmi'i jin putyí'uurej,
 ajta ti'ij néijmi'i jimi tyí'sejria'aj,
 ajta a'íin néijmi'i tyi'mua'réeriaj ajta je'en
 néijmi'i jin tyu'tyámue'tin,
 tyiche' tyaatatyójtzi're'en a'íjna i ti naa een,
 tyajta jimi tyu'táchuiicaj.

13 A'yaa nu nyajta tyáanamujri' ti a'íjna i
 Dios ti tyú'taahuaca' tajapuá ti tyejé'sejre', ajta
 íiyan cháanacaj japua ti tyí'sejre', ajta jityán ti
 tyejé'sejre' i chuéj, ajta a'áa maj tyityejé'sejre' i
 jájtyij jitze ti ve'éj, a'yaa mu tyí'xajtaca'aj tijin:
 Tyiche' tyaatatyójtzi're'en a'íjci i ti acájca i
 ipuárij jitze, tyajta a'íjci i cánya'aj,
 tyiche' jaatyátzaahuatye'en, tyajta tyámua' ty-
 eetyátoonyij,
 che' a'íin néijmi'i jin antyúumua'reeriaj jusén
 jime'.

14 Majta a'íimaj i maj muáacuaj i maj júurij,
 a'yaa mu tyu'taxájtaca' tijin:

—Che' a'yan tyá'ra'nyij. Majta a'íimaj
 i huásij, a'íi mu tyítunutaxij majta
 jaatyánajchaca' i Dios.

6

A'íjna i ti arahua'puaquej ajvi'tyíhuajmee

1 Aj nu nyij jaaséej ti'ij i cánya'aj séej ja-
 jsújtza'an i ti ájvi'tyijhuaca'aj i yu'xarij jitze,
 aj nu nyij séej huánamujri' i ti hua' jitze
 ajtyáma'can i maj júurij i maj muáacuaj, a'yaa

pu'ij tyu'taxájtaca' a'yan namuáaria'can ti'ij maj huatyényuunyij tijin:

—Mujo'té'yi'ij.

² Nyati'ij nyij atányeeriaca' aj nu nyij cahuáayu' ti cuéeinara' huaséj, ajta i ti avá'catyii a'íi pu tú'namua'aj iityéchooca'aj i jumuáca' jitze. Majta je'en cúruun jaati'ij, aj pu'ij iirájraa ti'ij hua'antyimue'tin a'yaa pu'ij néijmi'i jin tyu'tyáamue'tij.

³ Ti'ij a'íjna i cánya'aj ajtáhua'aj séej ajsújtza'an, a'yaa nu tyáanamujri' ti ajtáhua'aj síj i ti ajta hua' jitze ajtyáma'can i maj júurij i maj muáacuaj, a'yan tyu'taxájtaca' tijin:

—Mujo'té'yi'ij.

⁴ Aj pu'ij ajtáhua'aj síj i cahuáayu' iirájraa ti po'xara'. Ajta i ti avá'catyii a'íi pu a'íjna jin antyúumua'reeriaca'aj ti'ij huo'itziitye'en i tyeítyee i maj a'yan séejre' i cháanacaj japua, mej mij huóocui'nyij síj ajta síj, a'íi pu ajta ja'ancuré'chuij i chúun ti ve'éj.

⁵ Ti'ij a'íjna i cánya'aj ajtáhua'aj séej ajsújtza'an, a'íj nu séej huánamujri' i ti hua' jitze ajtyáma'can i maj júurij i maj muáacuaj, ti a'yan tyu'taxájtaca' tijin:

—Mujo'té'yi'ij.

Nyati'ij nyij nyajtáhua'aj atányeeriaca', aj nu nyij cahuáayu' huaséj ti xú'muara', ajta i ti avá'catyii, a'íi pu ji'tyéchooca'aj i maj jin tya'cá'itie'raj.

⁶ Nyati'ij nyij a'tíj huánamujri' ti hua' tzajta' a tyojo'taxájtaca' a'íimaj jimi maj muáacuaj i maj júurij, a'yan tijin:

—Séej mediidaj i tyerícuj, a'yaa pu tyá'najchij ti'ij a'tíj tyá'mue'tij séej xicáj, ajta huéicaj mediidaj i tyerícuj ti titi'ijme' ijmuéeya'ajmee, a'yaa pu cha'tána'aj tyá'najchij ti'ij a'tíj tyá'mue'tij séej xicáj, ajta capáj yó'jipuan i aséityij, nusu i nahuáj.

⁷ Ti'quij i cánya'aj ajtáhua'aj séej ajsújtza'an, aj nu nyij jáanamujri' ti ajtáhua'aj i síj i ti ajta hua' jitze ajtyáma'can i maj júurij i maj muáacuj, a'yan tyu'taxájtaca' tijin:

—Mujo'té'yi'ij.

⁸ Nyati'ij atányeeriaca', cahuáayu' nu huaséj ti cíi tyí'tyoomuara', ajta i ti avá'caj, a'yaa pu ántyapuj tijin: I ti huá'cui'caa. Ajta síj cújta' huama'ca'aj i ti a'áa tyejé'ijtaj i hua'tzajta' i mu'chítýee, ajta je'cácaa jimi i tyeítyee antyúumua'reej i maj a'yan huacháatimee i cháanacaj japua, mej mij huó'cui'nyij i tyeítyee a'íjna jime' maj tyúunyo'si'tye'en, nusu tújrij jime', na'ríj cui'nyi'ra'aj jime', nusu a'íjma jime' i tyi'tyán i maj tyí'tyaci'macaa.

⁹ Ti'ij i cánya'aj ajtáhua'aj séej ajsújtza'an, aj nu nyij huo'séj jityán i ipuárij a'íjma i maj a'íjna jin huá'cui'iihuaca' maj jaaxájtaca' i nyúucaria'ra' i Dios, majta a'íjna jitze tyámua'tyityahuóocha'ij.

¹⁰ A'yaa mu ca'nyín jin tyí'xajtaca'aj tijin:

—Tavástara', mu paj ji'reenya'aj séejre', pajta quee tyi'tíj jin á'itzeere', ¿a'náj nyij pahuá'xijtye'en a'íjma i maj cháanacaj japua jo'cháatimee, a'íjna jime' i maj táacuj?

11 Aj mu mij cáanarij tyihuo're'pij ti tyi'titi'ijmee ti tyí'cueenaa, majta a'yan tyihuo'té'exaaj maj cǎ tyityahuóoso'pe'en, 'asta mana'aj quee huo'néijmi're'en i hua' ihuáamua', i maj majta tyí'huiire' i Dios jimi, mej mij a'yan cha'taj mana'aj éenye'que' huácu'nyij mat'ij a'íimaj.

12 Ti'ij a'íjna i cánya'aj i ta'ráseevij ajsújtza'an, aj nu nyij jaaséj ti cháanacaj ca'nyíin jin huatóoca'tzij. Ajta i xicáj huatyáxu'muariaca', a'yaa pu huasé'rihua'aj ti'ij i cíixurij ti xú'muaa, ajta a'íjna i máxcirie' huatyápo'xariaca', a'yaa pu huasé'rihua'aj ti'ij xúure'ej,

13 majta i xú'ra'vetyee a'íi mu uje'cáavatzij i chuéj japua, a'yájna ti'ij i táque'ra' i xápua' tipua'aj i ciyáara' ca'nyíin jin huatáhuaaxi'in i áacaj jime'.

14 Ajta i tajapuá a'yaa pu huataséjre ti'ij tipua'aj a'tíj yu'xarij huatyéjire'en, ajta néijmi'i i jiríj ti huaquéetimee, ajta jo'tij ja'rahuáchijmee i jájtyij japua, néijmi'i pu aja'yee jo'quéetima'aj ta'raa.

15 Majta néijmi'i i maj tyi'tíj jin tyityatatyíj, a'íi mu huatyóo'avaataca' tyásta'naj tzajta', majta tyetyéj tzajta' nusu i jiríj jitze, hua' jamuán i tajtúhuaanyij, i maj tyihua'ijtye' i xantáaru'uj, i maj chíjtyaanyi'ij pué'een, majta i maj va'cán jin tyityatatyíj, néijmi'i i maj ca'nyéjrij jin tyí'huiiria'ca'aj majta i juxáahuaj séjria'ca'aj,

16 a'yaa mu tyihua'jeevaca'aj i jiríj majta i tyetyéj tijin:

—Siata'aj tajapuá rájvetyij siaj sij ta'vá'naj ti'ij

quee taaséj a'íjna i ti acájca i ipuárij jitze, ajta ti'ij quee puéjtzij táaci'tyij a'íjna jime' i cánya'aj ti jin nyú'camui'.

¹⁷ Ji'nye pu'ríj tya'rá'aj a'ájna xicáara' maj jitzán puéjtzij taatá'sij, ¿a'tanyíj pújoorej ti'ij tyo'táviicue'en a'íjna jime'?

7

A'íimaj i maj Israel jitze ajtyáma'can i Dios ti hua'vá'jajpuaxij

¹ Nyajta je'en muáacuacaa huaséj i maj tajapúa tyí'huüre', maj a'áa jo'tyú'uuca'aj, síij pu a'áa jo'tyávaaca'aj jo'tij i xicáj jé'ejnyinyiij, ajta síij jo'tij i xicáj ja'ancáru'pij, ajta síij ajtyapuáj pujmua', ajta i síij áatyej pujmua' pu jo'tyávaaca'aj, a'íi mu mij quee tyi'tá'care'ej ti huatá'aacarej i chuéj japua, na'ríij i jájtyij japua nusu i ciyéj tzajta'.

² Nyajta nu séej huaséj i ti tajapúa tyí'huüre' ti a'áa pujmua' ja'vá'ma'ca'aj jo'tij jé'ejnyinyiij i xicáj, a'íi pu ji'tyátijcaa a'íjna i ti jin hua'ajtyiyú'xaxi'in i huá'cuaatze' i tyeítyeristyamua'me'en i Dios ti júurij. A'íi pu'ij ca'nyíin jin huo'tajé a'íimaj i maj a'íjna jin antyúumua'reeriaca'aj maj je'ej pua'aj jáa'uurej i cháanacaj, majta i jájtyij ti ve'éj.

³ A'yaa pu tyihuo'té'exaaj tijin:

—Caxu je'ej pua'aj ja'uurej i cháanacaj, i jájtyij ti ve'éj, nusu i ciyéj, 'asta tyana'aj quee hua'ajtyiyú'xaxi'in huá'cuaatze' a'íimaj i maj jahuüre' i taj Dios.

⁴ Nyati'ij nyij jáanamujri' a'chu maj ará'axcaa i maj hua'ajtyiyú'xaxij, a'yaa mu pua'maca'aj anxityej japuan huá'puatyej japuan muáacuj ví'ra'aj, a'íi mu a'íin pué'een i maj Israel jitze eeráma'can.

⁵ Tamuáamuata' japuan hua'puaj ví'ra'aj mu pua'mácan ajtyiyu'xaxij i maj Judá jitze eeráma'can, majta tamuáamuata' japuan hua'puaj ví'ra'aj i maj a'íjna jitze eeráma'can i Rubén, majta tamuáamuata' japuan hua'puaj ví'ra'aj i maj a'íjna jitze eeráma'can i Gad,

⁶ majta tamuáamuata' japuan hua'puaj ví'ra'aj i maj Aser jitze eeráma'can, majta tamuáamuata' japuan hua'puaj ví'ra'aj i maj a'íjna jitze eeráma'can i Neftalí, majta tamuáamuata' japuan hua'puaj ví'ra'aj i maj Manasés jitze eeráma'can,

⁷ majta tamuáamuata' japuan hua'puaj ví'ra'aj i maj Simeón jitze eeráma'can, majta tamuáamuata' japuan hua'puaj ví'ra'aj a'íimaj i maj Leví jitze eeráma'can, majta tamuáamuata' japuan hua'puaj ví'ra'aj i maj Isacar jitze eeráma'can,

⁸ majta tamuáamuata' japuan hua'puaj ví'ra'aj i maj Zabulón jitze eeráma'can, majta tamuáamuata' japuan hua'puaj ví'ra'aj i maj José jitze eeráma'can, a'yaa mu cha'taj mana'aj tamuáamuata' japuan hua'puaj ví'ra'aj tyitya'rá'axcaa i maj Benjamín jitze eeráma'can.

*A'íimaj i maj jéehua ará'asej majta cuéeinavi'
tyi'tyéechan*

⁹ Nyati'ij nyij nyajtáhua'aj atányeeriaca', aj nu nyij mui'caa huápu'i'ij hua'sej i tyeítýee i maj a'áa ja'tyúusiiria'ca'aj néijmi'i i maj séej chuéj japua já'ma'can, majta séej chájta'naj jitze já'ma'can, majta i maj seequéj tyu'xáxa'aj, jéehua mu huápu'i'ij ará'axcaa a'íj pu jin quee i'riitaca'aj ti a'tíj huo'tyé'iten. A'áa mu jo'tyú'uuca'aj i cánya'aj jimi. A'íi mu cuéeinavi' tyi'tyáchajcaa, majta tacíj iityepítima'caa.

¹⁰ Néijmi'i mu ca'nyíin jin a'yan tyí'tyejijhuaca'aj tíjin:

A'íjna i ti jin tajapuá huanyú, a'íj pu jimi
 já'ma'can i taj Dios
 i ti acájca i ipuárij jitze,
 ajta a'íjna jimi i cánya'aj.

¹¹ Majta néijmi'i i maj tajapuá tyí'huiire', a'íi mu ataváatima'caa jo'tij jo'tyéjvee i ipuárij, majta i huásij, majta a'íimaj i maj muáacuaj i maj júurij, a'íi mu mij ecóotutaxij jimi i ti acájca i ipuárij jitze, mati'ij mij jaatyánajchaca' i Dios,

¹² a'yaa mu tyu'taxájtaca' tíjin:

Che' a'yan tyá'ra'nyij.

I tyaj jimi tyu'táchuiicaj, ajta i ti naa een,
 i ti néijmi'i tyí'mua'reej, i tyaj jin tyé'tyojtzi're',
 a'íj pu jimi já'ma'can i Dios i jusén jime' séejre'.
 Che' a'yan tyá'ra'nyij.

¹³ Aj pu'ij síij i vásti' a'yan tyinaata'íhuo'ri tíjin:

—¿A'tyaanyíj maj pué'een a'múumaj mu maj cuéeinavi' tyu'cháatimee, ajta jo'nyij ma'rácij?

¹⁴ Nyati'ij nyij a'yan tyaaté'exaa tíjin:

—Muáaj paj vásti' jamua'reej. Aj pu'ij a'yan tyinaaté'exaaaj tijin:

—A'íi mu a'íin pué'een i maj tyo'táviicue'ri' i maj jéehua jaapuéjtzitariaca', a'múu mu meríj tyu'jó'sij i tyúucaanaa, majta tyu'cueenarej i tyúucaanaa a'íjna jime' maj ja'antzaahuaaj i Ciriístu' ti hua' jitze ma'can huamuí'.

¹⁵ A'íj mu jin a'áa já'sejre' jo'tíj jóonyee i ipuárij ti jitzán acájca i Dios, majta a'náj tina'aj jahuiire' i tyeyúuj tzajta', tújca majta tíca'. Ajta i ti acájca i ipuárij jitze, a'íi pu hua'cha'íj a'íjna jime' ti hua' jimi huatyá'itzeerej.

¹⁶ Camu che' huatatújritze'ej, camu majta che' huataí'icuj, capu che' i xicáj hua'tátzavi'tye'ej ja'mej, capu ajta hua'téexi'raj ja'mej i xicáj,

¹⁷ ji'nye a'íi pu i cánya'aj i ti a'áa jé'ta' já'sejre' a'íi pu hua'cha'íj ja'mej, a'íi pu'ij huá'vi'tin jo'tíj ja'rájmuuaa i maj jin júurij muá'ra'nyij, ajta i Dios pu tyámua' tyihuo'tyéjeevij, mej mij quee che' tyi'tíj jin juxaamuijritya'aj.

8

I ti aráahua'puaj i ti ájvi'tyijhuaca'aj ajta i cítzive'rij

¹ Ti'ij i cánya'aj ja'ajsújtza'an i ti ajvi'tyíihuaajma'caa, a'íjna i ta'ráahua'puaj, aj pu'ij tyu'puá'riaajraa u tajapuá, jé'ta' ooraj pu á'tyeej tiquee tyi'tíj namuajria'ca'aj.

² Aj nu nyij tányij arahua'puácaa huaséj i maj tajapuá tyí'huiire' maj jimi i Dios ajo'tyú'uuca'aj, a'íi mu mij tya'ancurá'ij i trompéetaj aráahua'puaj ti tya'rá'asej.

³ Aj pu'ij ajtáhua'aj sáij mujo've'mej ti ajta tajapuá tyí'huiire', a'íi pu cítzive'rij iityájajnaca'aj, aj pu'ij jitzán ajtyéechaxij i maj japuan tyí'mu'vejritacaa, majta je'en íjicua jéehua jaatá' tí'ij ja'antyítieeraj a'íjna i maj japua i maj japuan tyí'mu'vejritacaa ooroj ti jin taavijhua, ti a'áa já'sejria'ca'aj jo'tij jo'tyéjvee i ipuárij, jamuán i maj jin jahuooca'aj i Dios jimi.

⁴ Aj pu'ij ájcítzujtariaca' a'íjna i íjicua i muáca'ra'an jitze i ti tyí'huiire' u tajapuá, 'asta na'aj quee a'áa ja'rá'aj jo'tij já'sejre' i Dios, ajta pu ará'aj a'íjna i nyúucarij i maj jin jahuooca'aj i tyeítysteristyamua'me'en i Dios.

⁵ Aj pu'ij a'íjna i ti tajapuá tyí'huiire' jájtii i cítzive'rij, ajta ja'vá'jistej i tí'ixcuáa a'áa ti já'ma'can a'íjna japua i maj japuan tyí'mu'vejritacaa, aj pu'ij a'áa yo'cáaxirej i cháanacaj japua, aj nu nyij a'yan tyáanamujri' tí'ij maj huatyényuunyij, ajta jéehua tyi'tyáhuaasime'ej, majta tyána'axcava'ra'aj, ajta je'en huatóoca'tzij i cháanacaj.

A'íjna jime' i trompéetaj maj tyi'tyái'ca'aj

⁶ Majta a'íimaj i maj aráahua'puaj ará'asej i maj tajapuá tyí'huiire' i maj trompéetaj tyi'tyái'ca'aj, a'íi mu tyámua' huóoruuj mej mij a'íjna tzajta' ucáajijhua.

⁷ Ajta a'íjna i ta'nájcaj, a'íi pu ucáajijhuaca' a'íjna jitze i trompéetaj, mati'ij mij tyéetyee cáavatzij jamuán i tiéj xúure'ej ti á'naxcaj. Aj pu'ij japuan ráavatzij i cháanacaj, ajta je'en je'cáj tyu'rá'taa i ciyéj, ajta i tu'píj ti huá'raa néijmi'i pu huariá'taj.

⁸ Ajtáhua'aj sáij i ti tajapúa tyí'huüre', a'íi pu ajta ucáijihuaca' a'íjna tzajta' i trompéetaj, aj pu'ij tyí'tíj atyájríe i jáytyij jitze ti ve'éj, a'yaa pu huasé'rihua'aj tí'ij jíríj tí tyátaasima'aj, aj pu'ij je'cáj i jáytyij a'yan huaríj tí'ij i xúure'ej.

⁹ Majta je'cáj huácuij i jáata' maj tyityá'xoo, majta i báarcuj i maj japuan á'ciinyaca'aj i jáytyij, a'íi mu huatyána'xij.

¹⁰ Ajtáhua'aj i ti je'tyáa'sej i ti ajta tajapúa tyí'huüre', a'íi pu ajta ucáijihuaca' a'íjna jitze i trompéetaj, aj pu'ij xú'ra'vej tí ve'éj uje'cájvej, a'yaa pu tyá'taaca'aj tí'ij tatzárij, aj pu'ij aja'rájve je'cácaa japua i játya'naj, ajta je'cácaa japua jo'tíj ja'ajéexavi'ijmee.

¹¹ Ajta i xú'ra'vej a'yaa pu ántyapuaaca'aj tíjin Ta'antzíjvi, aj pu'ij je'caj i jáytyij antzíivi'ij ta'raa, a'íj mu mij jin mue'tíj huácuij i tyeítyee, a'íjna jime' i jáytyij tí antzíjvi.

¹² Ajta je'en i ti muáacuaj jitze je'tyáa'sej i ti ajta tajapúa tyí'huüre', a'íi pu ajta ucáijihuaca' i trompéetaj jitze, aj pu'ij je'ej pua'aj huaríj i xicáj, ajta i máxcirie', majta je'cáj i xú'ra'vetyee. A'íj pu'ij jin huatyática'riaca', jí'nye camu che' á'taaca'aj i tújca nusu tíca'.

¹³ Nyatí'ij nyij ajóonyeeriaca'aj, nyatí'ij cué'ra'vej huánamuajri' tí jútye' ímuáj já'ra'ra'ca'aj, ajta ca'nyíin jin a'yan tyí'xajtaca'aj tíjin:

—¡Cuíi' xaa, cuíi' xaa, cuíi' xaa, a'íimaj i maj japuan huacháatimee i cháanacaj, jí'nye jéehua mu jajpuéetzij muá'ju'un matí'ij ucáajijhua i

trompéetaj jitze a'íimaj i maj huéeicaj i maj tajapuá tyí'huiire'!

9

¹ Aj pu'ij i ta'anxíviij ucájijhuaca' i trompéetaj jitze, aj nu nyij xú'ra'vej huaséj ti uje'cájvej u jútye', ti'quij cháanacaj japua ja'rájvej, aj pu'ij ja'ancuré'chuij i ti jin tya'antácuunaj jo'tij ja'tyácun ti'quee ámiteere' a'chu ti jo'cátyeej.

² Aj pu'ij ja'antycúj jo'tij ja'tyácun ti'quee ámiteere' a'chu ti jo'cátyeej, aj pu'ij ájcítzujtariaca' ti'ij i oornaj ti ve'éj, ajta i xicáj, ajta i máxciríe', a'íi mu ootanámi'huaj muá'raa a'íjna jime' i citzíj.

³ Aj mu mij vítzi'see huataséjre i citzíj tzajta', majta je'en néijmi'que' i cháanacaj japua huataséjre, a'yaa mu tyihuo'tá' mej mij tyú'che've'en mati'ij i tyaxcáj.

⁴ A'yaa mu tyihuo'ta'íj maj quee je'ej pua'aj ja'uurej i tu'píj ti ajnyéj i chuéj japua, na'ríj ixáj tyi'tíj nusu ciyéj, sulu mej mij a'íjma mana'aj je'ej pua'aj huá'uurej i tyeítyee i maj quee ajtyiyu'si'huajmee i jucuáatze' maj tyeítyeristyamua'me'en pué'een i Dios.

⁵ Majta quee a'yan tyihuo'tá' maj huó'cui'nyij i tyeítyee, sulu mej mij puéjtzij mana'aj huo'tá'an a'chu anxí máxciríe', ajta i maj jin puéjtzij huo'ta', a'yaa pu tyihua'cui'ca'aj ti'ij tipua'aj tyáxcáj jaache'en.

⁶ A'ájna xicáara' jitze a'íi mu i tyeítyee jahuooniyij mej mij huá'cui'nyij, ajta capu je'ej tyu'tái'riitarij, jéehua mu huápu'íj

jaxie'va'aj muá'ju'un maj huá'cui'nyij, ajta quee je'ej tyu'tái'riitarij sulu a'yaa tya'ajpuéetzij muá'ju'un.

⁷ Majta i vítzi'see, a'yaa mu huasé'rihua'aj mati'ij i cahuáayu'uj i maj merij hua'cáanaxij mej mij huanyo'se'en, tyi'tíj mu ucarújtya'ajma'caa i jumu'új jitze, a'yaa pu huasé'rihua'aj tí'ij cúruun ooroj tí jin taavijhua, ajta i hua' nyéerimij a'yaa pu huasé'rihua'aj tí'ij tyéviij.

⁸ A'yaa mu majta tyityacácipuaca'aj mati'ij úucaa, ajta i hua' tamej a'yaa pu huasé'rihua'aj tí'ij i muájyej tamej.

⁹ Majta néijmi'que' canami'huajma'caa tyi'tíj jime' tí tyapúusti' pue'éenye'ej, ajta mati'ij ra'ra'ca'aj a'yaa pu namuajria'ca'aj i hua'anaj tí'ij i caríáata' cahuáayu'uj maj ju'va'jáapuajmee i maj jitzán aru'uj i maj nyo'se'.

¹⁰ Ajta i hua'cuasij a'yaa pu éenye'ej tí'ij tyáxcaj cuasij, a'íj pu'ij jitze séjria'ca'aj i maj jin a'yan á'tyeeren anxí máxcirie' mej mij puéjtzij huo'tá'an i tyeítjee.

¹¹ Ajta i tí tyihúa'ijtye' i vítzi'see, a'íi pu a'ín pué'een i júuricamej tí néijmi'i jin antyúumua'reej a'ájna jo'tíj ja'tyácun tíquee ámiteere' a'chu tí ajo'cátjee, a'yaa pu ántyapuj huá'nyuucaa jime' i Hebreos tíjin Abadón ajta huá'nyuucaa jime' i Griego a'yaa pu ántyapuj tíjin Apolión.

¹² Pu'ríj síij mu jo'mej i maj jin jajpuéetzij muá'ju'un, ajta óoche' hua'puaj tyá'itzeere' i tí

a'yan tye'mej.

¹³ Aj pu'ij i ti tajapuá tyí'huiire' i ti arájseej, a'íi pu ajta ucájijhuaca' i trompéetaj jitze, aj nu nyij a'tíj huánamuajri' ti a'áa tyajá'xajtaca'aj jo'tíj jo'tyéjvee a'íjna i maj japuan tyí'mu'vejritacaa ti a'áa já'sejria'ca'aj i Dios jimi.

¹⁴ A'yaa pu'ij tyaaté'exaa a'íjci i ti tajapuá tyí'huiire' tíjin:

—Pata'aj hue'ejxiixij a'íimaj i maj muáacuaj i maj eetyánami' a'ájna véjri' játya'naj jitze ti ve'éj ti a'yan ántyapuaj tíjin Éufrates.

¹⁵ Aj pu'ij hue'ejxiixij a'íjma i maj muáacuaj, mej mij i huó'cui'nyij je'cácaa i tye'ityee i maj a'yan huacháatimee i cháanacaj japua, ji'nye a'íi mu tyámua' éenye'ej mej mij a'yan huárinyij a'ájna xicáara' jitze, a'íjna máxcirie' jitze, ajta a'íjci jitze i nyinyi'ra'aj.

¹⁶ Majta i xantáaru' i maj avé'tye'tye'ej, a'yaa nu tyáanamujri' maj hua'puaj anxityej ti séej ví'ra'aj ti ara'ástimee ará'axcaa.

¹⁷ A'yaa nu nyij tyihuo'séj i cahuáayu'uj, majta i maj avé'tye'tye'ej, a'íi mu antyóonajca'aj i jutavíj jitze tyi'tíj jime' ti a'yan huasé'rin ti'ij tiéj, ajta cuatúmua ajta tyóomuaa jamuán. Majta i cahuáayu'uj, a'yaa mu eenye' ijmu'ujma'caa mati'ij muajyéj, ajta i hua' tyenyij jitze pu éejnyinyiica'aj i tiéj jamuán i citzíj, ajta tyi'tíj ti tyóomuaa ti a'yan tyáarie' ti'ij tyapúusti'.

¹⁸ A'íj mu jin je'cáj huácuij i tye'ityee a'íjna jime' i tiéj, ajta i citzíj, ajta a'íjna i ti a'yan tyaarie'ej ti'ij tyapúusti' i ti éejnyinyiica'aj i hua' tyenyij jitze i cahuáayu'uj.

19 Ji'nye a'íjna i maj jin jaayí'tin mej mij tyi-tyáacui'nyij a'íi pu hua' tyenyij jitze séjria'ca'aj, ajta i hua'cuasij jitze, ajta i hua'cuasij a'yaa pu huasé'rihua'aj mati'ij cú'cu'see, majta jumu'új jin je'ej pua'aj huá'uuriajca'aj i tyeítyee.

20 Majta i séecan i tyeítyee i maj quee huácuij a'íjna jime' i cui'nyi'ra'aj, camu jaatapuá'citaca' maj je'ej pua'aj rijcaa, nusu maj janajchej i tyiyáaru', majta i sánturij ooroj maj jin taav-ijhua, nusu pláataj jime', nusu coobre jime', ca' tyetyéj jime', nusu ciyéj jime', i maj quee iityanamúáarajmee majta quee rácijci'nyive'.

21 Camu majta jaatapuá'citaca' i maj quee che' tyí'tyacui'caj, nusu maj quee che' tyí'chahueeraj, camu majta jaatapuá'citaca' maj tyí'xana'cire'ej, nusu maj tyí'nahua'aj.

10

A'íjna i ti tajapuá tyí'huiire' ajta i yu'xarij ti jiri'

1 Nyati'ij nyij nyajtáhua'aj séej huaséj i tajapuá ti tyí'huiire', ti va'cán jin antyúumua'reej, a'íi pu jútye' aje'cáma'ca'aj ajta jéetirij je'cánajca'aj, cu'xa'aj pu ajta atahuíjca'aj i mu'úura' jitze, a'yaa pu i nyéerima'ra' tya'tátaave'ej ti'ij i xicáj, ajta i icájra'an a'yaa pu huasé'rihua'aj ti'ij tyí'tíj ti tyátaasij.

2 A'íi pu yu'xarij iityépijca'aj i jumuáca' jitze ti cále'en, aj pu'ij i ju'íicaj jumuáca'ta' ti pujmua' jin ará'íicataca' i jájtyij japua ti ve'éj, ajta i chuéj japua ará'íicataca' i séej jime' i ju'íicaj útata' ti pujmua'.

³ Aj pu'ij ca'nyíin jin huajíjhuaca', a'yaa pu namuajria'ca'aj ti'ij muájyey ti jijhuaca'aj, ti'ij huajíjhuaca', aj mu mij víityee huatanyúj aráahua'puaj pua'máj.

⁴ Mati'ij a'yan tyityaatanyúj i víityee aráahua'puaj pua'máj, nyáaj nu jo'tyeyu'xajche', nyati'ij nyúucarij huánamuajri' ti jútye' nyojo'tajé a'yan tijin:

—Pata'aj jú'mua'reeriaj je'ej maj tyu'taxájtaca' i víityee maj huatyényuj aráahua'puaj pua'máj, capáj ja'yu'xaj.

⁵ Ajta i tajapuá ti tyí'huüre' i nyaj jaaséej ti jájtyij japua ja'rá'icacataca', ajta chuég japua ajta ja'rá'icacataca', a'íi pu ajmécjca'taca',

⁶ ajta a'yan tya'tóoratziiri' nyúucaritze' a'íjna i ti jusén jin júurij, i ti jaatyátaahuaca' i tajapuá ajta i cháanacaj, ajta a'íjci i jájtyij ti ve'éj, ajta i maj jitzán tyityá'xoo. A'yaa pu tyu'taxájtaca' tijin:

—Pu'rij ajtyojo're'nyesij a'ájna xicáara' ti jitzán néijmi'i tye'entyipua'rij,

⁷ a'ájna pu atyojo're'nyesij ti'ij ucáajijhua i ti tajapuá tyí'huüre' i ti aráahua'puaj pu'éen, aj pu'ij néijmi'i tya'róo'astesij a'íjna i ti ju'avaaj i Dios jimi, ajta je'ej ti a'íin tya'tóoratziiri' a'íjma jimi i maj jahuüria'ca'aj.

⁸ A'íjna i nyúucarij i nyaj jáanamuajri' ti jútye' tyajá'xajtaca'aj, a'yaa pu ajtáhua'aj tyinaat'éexaaj tijin:

—Áricuj a'íjci jimi i tajapuá ti tyí'huüre' pata'aj ja'ancuráain i yu'xarij ti ji'tyíi' i jumuáca'ta' pujmua' i ti jájtyij japua rá'icaj ajta i chuég japua.

⁹ Aj nu nyij ujó'mej a'íjci jimi i tajapúa ti tyí'huiire', nyati'ij nyij jaatáhuaviiri' ti naati'tye'en i yu'xarij ti cíleen, a'yaa pu'ij tyinaaté'exaaj tijin:

—Yana'cuíj pata'aj jaatyájci'mej. A'yaa pu mua'mé'ra'catye'ej ta'mej mua' tyényi'tze' mati'ij sarátyee, ajta mua'tziívi'tye'ej ta'mej mua' jucáatze'.

¹⁰ Nyati'ij nyij ja'ancurá'ij a'íjci i yu'xarij ti cíleen i muáca'ra'an jitze a'íjna i ti tajapúa tyí'huiire', nyati'ij nyij jaatyájci'cij, naa pu tyinu'cacarejca'aj i nyetyényij jitze ti'ij sarátyee, ajta nyati'ij yo'xij, a'íi pu na'ra'tziívi'riajraa i nyajucáa jitze.

¹¹ Aj mu mij a'yan tyinaaté'exaaj tijin:

—A'yaa pu tyúuxie've' paj tyihuo'té'exaatye'en a'íimaj i tyeítyee i maj séej chuéj japua já'ma'can, ajta i maj séej nyúucarij jin tyí'xaj, pajta a'íijma i maj tyihuá'ijtye'.

11

A'íimaj i maj hua'puaj i maj tyámua' tyi'táj tyí'mua'reej

¹ Aj mu mij tyi'táj ciyéj naatáchuij i maj jin tyí'ite'racia a'chu ti huatátyeej, majta a'yan tyinaaté'exaaj tijin:

—Ájchesij pajta jaatyé'iten a'chu ti ve'éj i tyeyúuj i Dios ti ja'a'rij, pajta a'íjci a'chu ti ooyóhuaj i maj japan tyí'mu'vejritacaa, pajta je'en huo'tyé'iten a'chu maj ará'asej i maj jana-jchej.

² Ajta capáj ja'iteej a'chu ti antayóhuaj a'ájna a pua'quéj a ti ja'rájta'cuaj, ji'nye a'íjma mu huatátuui i maj quee tyá'tzaahuatye', mej mij a'íimaj huá'puatyej japuan hua'puaj máxciríe' je'ej pua'aj jáa'uurej i chájta'naj ti naa een.

³ Nyáaj nu hua'puácaa huata'ítij, i maj quee naa eenye' tyi'tyéechan, mej mij a'íimaj tyihuo'té'exaatye'en i Dios jitze ma'can, a'yan mua'tyéevi'ij a'chu séej ví'ra'aj japuan hua'puaj anxityej japuan huéicatyey xicáj.

⁴ A'íimaj i maj hua'puaj a'íi mu a'ín pué'een i maj hua'puaj i maj antyitátzajmee majta i aseitúunaj ti hua'puaj ti jimí aja'ré'vej i tavástara' jimi ti íiyan tyí'ijta i cháanacaj japua.

⁵ Típua'aj a'tíj je'ej pua'aj huá'uuriajmuí'ij, hua' tyenyij jitze pu i tiéj éejnyinyii, a'íj mu mij jin huo'tyátieeraj i maj hua'ajcha'íire', a'yaa mu mij tyí'tyacui'nyij a'íimaj i maj a'yan tyá'xie've' maj je'ej pua'aj huó'uurej.

⁶ A'íimaj i maj hua'puaj, a'íi mu jaayí'tin mej mij huo'tá'ijmuj i víityee mej mij quee che' viiyej meentyij móoj tyihúa'ixaatye' i tyeítyee i Dios jitze ma'can, majta mu jaayí'tin mej mij seequéj jáa'uurej i jájtyij tí'ij a'yan huárinyij tí'ij xúure'ej, ajta maj puéjtzij huo'tá'an a'íimaj i tyeítyee i maj a'yan séejre' i cháanacaj japua, néijmi'i jime' i cui'nyi'ra'aj, a'chu maj a'íimaj a'yan tyá'xie've'.

⁷ Ajta mati'ij ja'antypuá'ritye'en i maj nye jitze ma'can tyu'taxájtaj, aj pu'ij tyi'tíj a'áa je'taméj jo'tij ja'tyácun i tiquee ámiteere' a'chu ti jo'cátyeej, aj pu'ij huo'tanyó'si'tye'sij, ajta je'en

huo'tyámue'tij ti'quij huá'cui'nyij.

⁸ A'áa mu ja'séeria'aj muá'ju'un i mui'chítyee a cáayej jitze a'ájna i chájta'naj jitze ti ve'ej ti a'yan tyaja'rájtyapuaaj tijin Sodoma ajta Egipto, jo'tij ajta i hua' vástara' jó'tateehuaca' i cúruuj jitze.

⁹ Majta huéicaj xicáj japuan jé'ta' á'tyeeren maj hua'séeraj muá'ju'un i mui'chítyee a'íimaj i tyeítyee i maj a'yan huacháatimee néijmi'que' i cháanacaj japua, i maj séej nyúucarij jin tyí'xaj, majta i maj séej chuéj japua jo'cháatimee, ji'nye camu huo'ta'sij maj tyityáa'avaataj.

¹⁰ Majta a'íimaj i maj íiyan huacháatimee i cháanacaj japua, a'íi mu huatóotyamua'vej a'ájna jime' i maj meríj huá'cuii. A'íi mu huápuí'ij huatóotyamua've'sij metyí'ye'estyaj, majta tyu'tóopuejve'sij séej jamuán majta séej, ji'nye a'íimaj i maj hua'puaj i maj Dios jitze tyí'xaj jéehua mu huápuí'ij huá'itziitya'ca'aj.

¹¹ Ajta ti'ij huéicaj xicáj japuan jé'ta' tyoomá'caj, Dios pu huo'tájuurityej aj mu mij ájhuiixij i maj meríj huácuí'ijcaa, majta a'íimaj i maj huo'séj jéehua mu tyu'tátziin.

¹² Matí'ij mij a'íimaj i maj hua'puaj nyúucarij huánamuajri' ti ca'nyíin jin uje'cánamuajrej u jútye' a'yan tijin:

—Xié'ejciinyij a'yájna.

Aj mu mij jéetirij jitze tyicíj, mahua'raséeracaj i maj hua'ajcha'íire'.

¹³ Aj pu'ij ca'nyíin jin huatóoca'tzij i cháanacaj, a'íj pu jin á'vatzij i tyihuá'chi'ij i chájta'naj jitze majta aráahua'puaj ví'ra'aj

ì tyeítýee huácuij. Majta a'íimaj ì tyeítýee ì maj quee huácuij, jéehua mu tyi'tzínýe'ej metyaatatyójtzi'rej ì Dios tajapuá ti já'sejre'.

¹⁴ Pu'ríj mu jo'mej ì ti hua'puaj ì maj jin jaapuéjtzitariaca', ajta pu'ríj ajtyojo're'nyesij ì ti huééicaj ì maj jin majta jajpuéetzij muá'ju'un.

I trompéetaj ti aráahua'puaj

¹⁵ Aj pu'ij ì ti tajapuá tyí'huiire' ì ta'ráahua'puaj, a'íi pu ucájijhuaca' ì trompéetaj jítze, aj nu nyij nyúucarij huánamuajri' ti ca'nyíin jin atyojo'taxájtaca' u jútye' a'yan tíjin:

A'íjna ì ti tyí'ijta íiyan cháanacaj japua a'íi pu arí a'íin pué'een ì Dios ajta ì tavástara', a'íi mu tyí'ítaj muá'ju'un jusén jime'.

¹⁶ Majta a'íimaj ì huáasij ì maj seityéj japuan muáacuaj ará'asej ì maj majta ju'ipuáa japua acáatyij ì Dios jimi, a'íi mu ecóotutaxij majta je'en jaatyánajchaca' ì Dios,

¹⁷ a'yaa mu tyu'taxájtaca' tíjin:

Tyetyi'muatyójtzi're', tavástara', Dios mu paj néijmi'i jin antyía'mua'reej, mu paj jájcuaaj imuáj séjria'ca'aj pajta ijíij séejre', ji'nye muáaj paj períj va'cán jin tye'entyájruij, pajta períj huatye'chej pej pij tyu'ta'íjtaj.

¹⁸ Majta a'íimaj ì maj séej chuéj japua já'ma'can jéehua mu huatanyínyu'cacuca', ajta arí tya'rá'aj a'náj paj pajta muáaj huatanyú'caj, pu'ríj atyojo're'nyej a'ájna xicáara' paj jitzán huá'xijtye'en a'íimaj ì maj meríj huácuij,

pajta tyámua' tyihuo'tá'sij a'íjma i maj a jitze
 ma'can tyí'xaj,
 majta i maj muéetzij jimi tyámua' tyí'tyesejre',
 majta a'íjma i maj a'jimi tyá'tzaahuatye',
 tipua'aj i maj va'cán jin tyityatatyíj, na'ríj
 cíléenye' jin metyityatatyíj,
 pajta hua'antypua'ritye'sij a'íjma i maj je'ej
 pua'aj ja'uurej i cháanacaj.

¹⁹ Aj pu'ij i tyeyúujra' i Dios i tajapuá ti já'sejre'
 antacúj, ajta i tyeyúuj tzajta' pu séjria'ca'aj a'íjna
 i chí'ij ti cíleen ti ajta tzajta' séejre' i nyúucarij ti
 jin i Dios tya'tóoraj. Majta huatyána'axcava'xij
 majta tyényuuca'aj, ajta huatóoca'tzij i chuéj,
 majta jéehua tyéetyee cáavatzij.

12

I íiti' ajta i cú'cu'uj

¹ Aj pu'ij tyi'tíj huataséjre u jútye', íiti'
 pu huataséjre ti cáanarij tyí'chajca ti naa
 tyi'tyatáatiyi'ij ti'ij xicáj, ajta máxcirie'
 japua újvaaca'aj a'íjna i íiti', ajta cúruun
 ucárujtya'ca'aj maj jitzán tamuáamuata' japuan
 hua'puaj i xú'ra'vej séjria'ca'aj.

² Ajta jútza'ca'aj a'íjna i íiti', a'íj pu jin juyiiny-
 aca'aj a'íjna jime' ti já'cui'ca'aj, ji'nye pu'ríj tin
 tyiyóoj ta'mej.

³ Ajtáhua'aj síj tyi'tíj huataséjre u jútye',
 cúcu'uj pu huataséjre ti po'vij ti vivéj, ajta
 arahua'puácaa íjmu'uj, ajta tamuáamuata'
 pua'mácan ava'ahuájmee, ajta je'en cúruun
 ucarújtya'ajma'caa i ju'a'huáj jitze i ti
 aráahua'puaj ará'asej.

4 Ajta i jucuasij pu jin hua'curia'naj je'cácaa i xú'ra'vej i maj jútye' já'sejre', ti'quij huaje'cáahua'xij i cháanacaj japua. Ajta je'en i cú'cu'uj, a'áa pu jo'tyéechaxij a'íjci jimi i íiti' ti arí tin tyiyóoj ja'mej ta'aj ij jaatyájci'mej ti'ij huanie'huaj i yójra'.

5 Aj pu'ij tyiyóoj ta'raa tyáatacan a'íjna i íiti', a'íi pu a'ín pué'een i ti ca'nyéjrij jin tyihuo'ta'íjtye'sij mati'ij mana'aj pua'máj a'yan séejre' i cháanacaj japua. Ajta a'íjci i yójra' i íiti' Dios pu yo'ví'tij u tajapuá jo'tij a'ín já'sejre' ajta jo'tij a'ín jo'tyájcay i ipuárij jitze,

6 aj pu'ij i íiti' huatóo'uj a'ájna jo'tij quee já'tyi'tij, jo'tij ajta Dios tyámua' yo'uurijtze mej mij a'áa tyiyo'cue'tyej séej ví'ra'aj japuan hua'puaj anxityej japuan huéecatyej xicáj jitze.

7 Mati'ij támij huatyóohuj maj huatyényo'se'en u tajapuá, a'íjna i Miguel majta i maj jamuán tyí'huiire', a'íj mu jimi nyo'sa'ca'aj i cú'cu'uj, majta jamuán i maj jahuiire' i cú'cu'uj,

8 majta quee capu tyu'mué'tij i cú'cu'uj, camu majta i maj jahuiiria'ca'aj, a'íj mu jin quee che' huo'ta' maj tajapuá jo'tyú'uucáj.

9 Mati'ij mij uye'cájríee a'íjci i cú'cu'uj ti vivéj, a'íjna i cú'cu'uj ti jájcuaj imuáj séjria'ca'aj, a'íjna i tyaj a'yan jatamuá'muaj tijn tyiyáaru', i ti huá'cuanamuaj néijmi'caa i maj a'yan séejre' i cháanacaj japua. Aj mu mij uye'cájríee íijan i cháanacaj japua, jamuán i maj jahuiiria'ca'aj.

10 Aj nu nyij nyúucarij huánamuajri' ti ca'nyín jin utyojo'taxájtaca' u tajapuá a'yan tijn:

—Pu'rij tyar'á'aj a'náj maj tajapuá

huatányuusij, a'íjna i ti néijmi'i jin putyí'uurej, ajta i ti jin tyu'ta'íjtaj i Dios, pu'ríj néijmi'i jin tyu'ta'íjtaj a'íjna i Ciríistu', ji'nye pu'ríj ayo'cájriee a'íjna i ti je'ej pua'aj huá'uuriajca'aj i ta'ihuáamua', i ti ajta a'náj tina'aj tyihuá'xajtzi'raca'aj i Dios jimi.

¹¹ A'íimaj i ta'ihuáamua' mu jaatyáamue'tij, a'íjna jime' ti i cánya'aj je'ráaxirej i juxúure', majta a'íjna jime' i nyúucarij i maj huó'ixaaj, camu majta tyí'tziinya'ca'aj tipua'aj muáacui'nyijche', sulu a'yaa mu tyitya'huóoca'an maj huáacui'nyij.

¹² Siata'aj huatóotyamua've'en mu siaj tajapúa já'sejre', siajta mua'aj mu siaj cháanacaj japua huacháatimee, siajta mu siaj a'áa ja'chej i jájtyij japua, cuí' xaa ja'mua jime', ji'nye mua'ajmaj jimi pu arí huataséjre a'íjna i tyiyáaru', ajta huápu'ij nyú'camui', ji'nye pu'ríj jamua'reej tiquee che' á'tyeeren.

¹³ Ajta i cú'cu'uj ti'ij jáamua'reeri' ti cháanacaj japua já'ajvej, aj pu'ij jaatavén a'íjci i íiti' ti tyiyóoj ta'raa.

¹⁴ Majta hua'puácaa mu jaatá' a'íjna i íiti' i anáara'an i cué'ra'vej ti ve'éj ti'ij huatará'ra'an a'ájna jo'tij quee já'tyi'tij, a'áa mu mij tyiyá'cue'tyajca'aj a'chu huéicaj nyinyi'ra'aj japan jé'ta' jítze.

¹⁵ Aj pu'ij i cú'cu'uj jéehua i jájtyij ejxirej i jutyényij jítze ti'ij yo'jójtye'en a'íjci i íitaj,

¹⁶ ajta i chuéj pu jaatyáhuui, ji'nye a'íi pu ootátzi'tyaca' ti'ij atyájrutyey i jájtyij i ti je'ejxirej i cú'cu'uj jutyényij jítze.

¹⁷ Aj pu jin i cú'cu'uj jaatájaaxiejvi'ri' a'íjci

ì íitaj, ajta je'en jó'raa ti'ij hu'o'tanyó'si'tye'en a'íjma ì séecan ì maj yójmua'mua' pué'een ì íitaj, ajta a'íimaj jimi ì maj ja'astej ì nyúucaria'ra' ì Dios, majta Jesús jitzán ma'can tyí'xaj.

¹⁸ Ajta a'íjna ì cú'cu'uj a'áa pu ja'séeria'aj ta'raa a sáata' jájtyij ti ve'éj ti ja'va'ástimee.

13

A'íimaj ì maj hua'puaj ì maj huápu'i'ij je'ej pua'aj huasé'rin

¹ Aj nu nyij tyi'tíj huaséj ti huápu'i'ij je'ej pua'aj huasé'rin, a'íj pu jitze ì jájtyij ti ve'éj eetamá'ca'aj, arahua'puácaa pu íjmu'ujcaaj ajta arahua'puácaa ava'ahuájma'caa. Ajta ì a'huáara' jitze pu cúruun tyo'carújtyi'huajma'caa síj ajta síj, ajta ì mu'úura' jitze tyé'yu'si'huaca'aj ì ti je'ej pua'aj namuajre' ì Dios jimi.

² A'íjna ì tyi'tíj ti je'ej pua'aj huasé'rin ì nyaj jaaséej, a'yaa pu huasé'rihua'aj ti'ij jíripu'uj, ajta a'yaa eenye' iira'ícajma'caa ti'ij júutze'ej, ajta ì tyénaya'ra' ti'ij muájyej. Ajta a'íjna ì cú'cu'uj, a'íi pu néijmi'i jaatátuii ì ti jin jaayí'tin ti tyi'tíj je'ej huá'uurej, ajta néijmi'i ì ti jin tyí'ijta ti'ij a'íjna jin antyúumua'reeriaj.

³ Ajta síj ì mu'úura' a'yaa pu huasé'rihua'aj cuxáa tyí'puejtyi'huaca'aj ì ti jin tin huamuí', ajta arí huarújca'aj a'íjna ì ti tyí'puejtyi'huaca'aj, a'íj mu jin néijmi'i ì maj a'yan huacháatimee ì cháanacaj japua, je'ej mu tyo'taséj, majta je'en ja'rá'astijrej a'íjna ì tyi'tíj.

4 Majta jaatyánajchaca' a'íjna i cú'cu'uj, ji'nye a'íi pu néijmi'i tyaatátui a'íjci i tyi'tíj ti je'ej pua'aj huasé'rin ti'ij a'ín néijmi'i jin antyúumua'reeriaj, majta mu jaatyánajchaca' a'íjci i tyi'tíj, a'yan metyi'xáataj tijin:

—¿A'tanyíj a'yan een ti'ij a'mújma mu tyi'tíj, a'tanyíj óoca'nyej ti'ij jimi huatyényo'se'en?

5 Majta mu jaatá' a'íjci i ti je'ej pua'aj huasé'rin ti'ij je'ej pua'aj tyaataxáj i Dios, a'yaa mu tyaatá' ti huá'puatyej máxcirie' japuan hua'puaj á'tyeevi' ti'ij a'íjna jin antyúumua'reeriaj.

6 A'yaa pu'ij huaríj, je'ej pu pua'aj tyí'xajtaca'aj i Dios jimi, ajta je'ej pua'aj tyihuá'xajtaca'aj a'íjma i maj a'áa já'sejre' i Dios jimi, ajta néijmi'caa i tajapuá maj já'sejre'.

7 Majta mu jaatá' ti'ij huo'tanyó'si'tye'en a'íjma i maj tyámua' tyí'tyesejre' i Dios jimi 'asta na'aj quee huo'tyáamue'tij, a'yaa mu majta tyaatá' ti'ij néijmi'caa jimi antyúumua'reeriaj i tyeítjee i maj a'yan séejre' i cháanacaj japua, majta i maj séej chuáj japua já'ma'can, majta i maj séej nyúucarij jin tyí'xaj.

8 Majta a'íjci i tyi'tíj ti je'ej pua'aj huasé'rin néijmi'i mu jaatyánajchaca' i maj a'yan huacháatimee i cháanacaj japua, a'íimaj i maj quee ooyú'si'huaca' jájcuaj imuáj ti'ij na'aj tyu'tyátaavijhuaca' i cháanacaj i yú'xaria'ra' jítze a'íjna i cánya'aj ti huatámu'vejrityi'huaca'.

9 Tipua'aj a'tíj iityánamuajra, che' tyámua' naa tyáanamujaj.

10 A'íjma i maj hue'tyánasij, miche' hue'tyáanaj, majta i maj chúun jime'

huá'cui'nyij, miche' majta a'yan tyityáacui'nyij. A'yaa mu mij tyityaataséjre'ej a'íimaj i maj tyo'táviicue' ajta i maj jin tyá'tzaahuatye' i Dios jimi.

11 Nyati'ij nyij nyajtáhua'aj séej huaséj i tyi'tíj ti je'ej pua'aj huasé'rin, ti a chóota' je'tanyéj. Hua'puácaa pu ava'ahuájma'caa ti'ij cánya'aj, ajta a'yan tyí'xajtaca'aj ti'ij i cú'cu'uj.

12 A'í pu ajta néijmi'i jin an-tyúumua'reeriaca'aj ti'ij a'íjna i ti anaquéej huataséjre i ti ajta je'ej pua'aj huasé'rin, a'yaa pu'ij tyihuá'ijtya'ca'aj maj néijmi'i i maj a'yan séejre' i cháanacaj japua jaatyáanajche a'íjci i ta'nájcaj i ti huarúj i ti tyí'puejtyi'huaca'aj i ti jin tin huamuí'.

13 A'yaa pu jéehua tyi'tíj tyí'uuriajca'aj i maj tyámua' tyo'taséj. Ajta pu jaayí'tihua'aj ti tiéj uje'cárieenyij u jútye' meeséeracaj i tyeítyee.

14 A'íj pu'ij jin huo'cuanamuaj i tyeítyee i maj a'yan séejre' i cháanacaj japua, ajta a'yan rijcaa a'íjci jimi i ti anaquéej huataséjre i ti je'ej pua'aj huasé'rin, ajta je'en huo'ta'íj mej mij jaatyátaahuaj tyi'tíj tyévira' ti a'yan huasé'rin ti'ij a'íjna i ti anaquéej huataséjre i ti tyí'puejtyi'huaca'aj a'íjna jime' i chúun ajta je'en óoche' júurica'aj.

15 Majta a'íjci i ti je'tyáa'sej i ti je'ej pua'aj huasé'rin a'yaa mu tyaatá' ti'ij jaatá'an ti tyu'taxáj a'íjna i maj jaatyátaahuaca' ajta je'en huó'cui'nyij a'íjma i maj quee jaatyáanajche.

16 Ajta néijmi'caa i maj ciléenye', majta i maj viváajma'aj jin tyityatatyíj, i chíjtyaanyi'ij,

i maj quee je'ej tyéejviicue', i maj juxáahuaaj jó'jujhua'an majta i maj ca'nyéjrij jin tyí'muarie', a'yaa pu tyu'ta'íjtaca' mej mij hua'náyu'xaxi'in i hua' muáca' jitze, nusu maj hua'ajtyiyú'xaxi'in i huá'cuaatze'.

¹⁷ Ajta quee i'riitaca'aj ti tyi'tíj huánanan nusu ti a'tíj tyi'tíj huátoonyij, tipua'aj quee anáyu'si'huaj i jumuáca' jitze, nusu quee ajtyiyú'si'huaj i jucuáatze' je'ej ti ántyapuaaj a'íjna i tyi'tíj.

¹⁸ A'íj pu jin a'yan tyúuxie've' maj jéehua tyu'yí'tihua'an, a'íjna i ti tyojó'itej, che' yo'itéej já'ra'nyij je'ej ti huatóomua'aj a'íjna i ti jin tyí'itej ajta je'ej ti ántyapuaaj a'íjna i tyi'tíj, ajta i ti jin tyí'itej, a'áa pu jo'vé'mej a'íimaj tzajta' i tyétyacaa, a'yaa pu'ij aráasej anxityej japuan huéecatyej japuan aráasej ti tyí'itej.

14

A'íjna i cánya'aj majta a'íimaj i ti hua'antyíhuoj

¹ Nyati'íj nyij jaaséj a'íjci i cánya'aj, ti a'áa jo'tyávaaca'aj i jiríj japua ti a'yan tyaja'rájtyapuaaj tijin Sión. Majta jamuán a'áan jo'tyú'uuca'aj i maj anxityej japuan huá'puatyej japuan muáacuaaj ví'ra'aj ará'asej i tyeítjee, a'yaa pu tyé'yu'si'huaca'aj i huá'cuaatze' jitze je'ej ti ántyapuaaj a'íjna i cánya'aj, ajta je'ej ti ántyapuaaj a'íjna i vástaria'ra'.

² Nyajta je'en tyi'tíj huánamuajri' ti u tapuá je'cánamuajria'ca'aj, a'yaa pu namuajria'ca'aj ti'íj jájtyij ti ca'nyíin tyájujhua'naj,

ajta a'yájna mati'ij i víityee maj tyényuuca'an, ajta i nyúucarij i ti jin tyu'taxájtaca', a'yaa pu namuajria'ca'aj mati'ij i maj tyí'cuiinaj a'íjna jítze i áarpaj.

³ Majta a'íjna chuüicaca'aj i chuüicarij ti jájcuaj a'íjna jimi i Dios, majta a'íimaj jimi i maj muáacuaj i maj júurij, majta hua' jimi i huáasij. Capu a'tíj jaayí'tihua'aj ti jáari'rej a'íjna i chuüicarij, sulu a'íi mu'uj i maj anxityej japuan huá'puatyej japuan muáacuaj ví'ra'aj ará'asej, i ti ajta huó'huüi íyan cháanacaj japua.

⁴ A'íi mu a'íin pué'een i maj tyámua' een, i maj quee huóoxana'cirej úucaa jamuán, i maj majta jamuán jó'juhua'an i cánya'aj jo'tij na'aj ti jooméj. A'íijma pu huáhuüi hua' tzajta' i maj a'yan séejre' i cháanacaj japua mej mij huatátuiiri'huaj i Dios jimi majta i cánya'aj jimi.

⁵ Camu a'náj tyi'tíj jin tyu'hué'taca', ji'nye ji're'nye'ej mu séejre' i Dios jimi.

Je'ej maj tyu'taxájtaca' i maj huéicaj i maj tajapuá tyí'huüire'

⁶ Nyajtáhua'aj nu séej huaséj i ti tajapuá tyí'huüire', jútye' pu já'ra'ra'ca'aj ti'ij nyúucarij huo'té'exaatyee' en néijmi'caa i maj a'yan huacháatimee i cháanacaj japua, i maj séej chuéj japua já'ma'can, i maj seequéj tyu'xáxa'aj, majta i maj séej chájta'naj jítze ja'chej.

⁷ A'yaa pu ca'nyíin jin tyí'xajtaca'aj tíjin:

—Siata'aj já'tyese' i Dios, siajta tyaatatyójtzi're'en, ji'nye pu'ríj tya'rá'aj a'náj ti huá'xijtye'en i tyeítyee. Siata'aj jaatyáanajche a'íjna i ti jaatyátaahuaca' i tajapuá, ajta

i cháanacaj, ajta i jájtyij ti ve'ej, ajta i ti huajéexavi'ijmee.

⁸ Ajtáhua'aj pu síj i ti tajapúa tyí'huüre' cújta' tyu'xájtasime'ej, a'yan tijin:

—Pu'ríj á'vej, pu'ríj á'vej a'íjna i Babilonia, a'íjna i ti huo'tyátimue'raj a'íjna jime' i ti hua'جاموآن huóoxana'cirej i maj a'yan séejre' i cháanacaj japua.

⁹ Aj pu'ij ajtáhua'aj síj ti tajapúa tyí'huüre' cújta' tyu'xájtasime'ej ca'nyíin jime' a'yan tijin:

—Típua'aj a'tíj janajchej a'íjci i tyi'tíj ti je'ej pua'aj huasé'rin, nusu huatóoa'an maj jo'simua' i cuáatza'ra'an jitze nusu muáca'ra'an jitze je'ej ti ántyapuj a'íjna i tyi'tíj ti je'ej pua'aj huasé'rin,

¹⁰ Dios pu jaatyátimue'raste'sij a'íjna jime' i ti huápu'ij nyú'camui', a'íjna i ti arí tyámua' jáaruuj ti a'yan een ti'ij huá've'rij ti tyu'jé'caj, a'íi pu'ij jajpuéetzij ta'mej i tiéj jime', ajta a'íjna jime' i ti a'yan curiá'rie' ti'ij tyapúusti', a'yaa pu'ij tya'ajpuéetzij ta'mej hua' jimi i maj tajapúa tyí'huüre', ajta a'íjna jimi i cánya'aj.

¹¹ Ajta ájcitzuj a'íjna jime' i maj jin japu'éetzij jusén jime', ajta quee hua'tá'caa maj huóoso'pe'en tújca nusu tíca', sulu a'yaa mu tya'ajpuéetzij muá'ju'un a'íimaj i maj jana'michej i tyi'tíj ajta i tyévira' majta i maj hua'ajtyiyú'xaxij je'ej ti ántyapuj a'íjna i tyi'tíj.

¹² A'yaa pu'ij huataséjre'ej i maj jin tyé'viicue' a'íimaj i maj tyámua' een, i maj a'yan ricij je'ej ti tyí'ijta i nyúucarij, majta ja'tzaahuatye' a'íjci i Jesús.

13 Aj nu nyij a'tíj huánamuajri' ti jútye' a'tyajá'xajtaca', a'yaa pu tyinaaté'exaaj tíjin:

—Miche' huatóotyamua've'en a'íimaj i maj ja'tzaahuatye' i tavástara'. Ajta i júuricama'ra' i Dios a'yaa pu tyí'xaj tíjin: “A'yaa pu tyi'ja'yájna, a'íi mu juso'pe'en, mej mij quee che' tyi'tíj jín á'viicue'ria'aj, ji'nye a'íimaj mu tyámua' tyu'muáriej.”

I chuéj japua ti tyú'ciiriaca'

14 Nyati'ij nyij a' únyeerica', aj nu nyij jéetirij huaséj ti cuéeinara', ajta a'tíj japuan újcatyii ti a'yan huasé'rihua'aj ti'ij tyáati'. A'íi pu cúruun ucárujtya'ca'aj ti ooroj jín taavijhua, ajta júxuj iityéchooca'aj.

15 Aj pu'ij síj ti tajapúa tyí'huüre' a'úun je'rájraa u tyeyúuj tzajta', a'yaa pu'ij ca'nyíin jín tyaatajé a'íjci i ti jéetirij japua anjo'o'jca'tyii tíjin:

—Pata'aj mu júxuj jín jaaré'vejche i ti arí tyí'ciirij, pajta tyu'riá'tzaanaj, ji'nye pu'ríj tya'rá'aj a'náj paj jitzán tyu'riá'tzaanye'ej pu'ríj huariá'ca'naca' i cháanacaj japua.

16 Ajta a'íjna i ti jéetirij japua áan jo'o'jcatyii, a'íi pu'ij tyu'riá'tzaj i ti tyú'ciiriaca' i cháanacaj japua.

17 Aj pu'ij ajtáhua'aj síj ti tajapúa tyí'huüre' iirájraa u tyeyúuj tzajta', a'íi pu ajta júxuj iityéchooca'aj.

18 Ajta jo'tij jo'tyéjvee a'íjna i maj japuan tyí'mu'vejritaca, a'áa pu síj ti tajapúa tyí'huüre' je'rájraa, a'íi pu a'íjna jín antyúumua'reej i tiéj, aj pu'ij a'yan tyaatajé a'íjci i ti júxuj iityéchooca'aj tíjin:

—Pata'aj jaaré'vejche, pajta jájsiire'en i táque'ra' i ciyéj ti a'áa jo'váatimee i cháanacaj japua, ji'nye pu'ríj cuasij a'íjna i táque'ra'.

¹⁹ Aj pu'ij i ti tajapuá tyí'huiire' jaaré'vejchaca', ti'quij jájsi i ti tyú'ciiriaca' i cháanacaj japua, aj pu'ij ju'cáahua'xij a'íjna tzajta' i maj jin jajache' i úuvaj, i ti a'ín pu'é'een i ti jin Dios huápu'i'ij nyú'camui'.

²⁰ A'áa mu mij yo'jáchej apua'quéj i chájta'naj jitze, aj pu'ij xúure'ej eerámu'yaca', a'yaa pu'ij ootí'ij ja'raa ti'ij jo'tij ja'tá'asej i xáachime'ra'an i cahuáayu', ajta a'yan japua huatámu'yaca' a'chu huéicaj anxityej quilometrojo.

15

A'íimaj i maj tajapuá tyí'huiire' ajta i puéjtzij ti aráahua'puaj ará'asej

¹ Nyajtáhua'aj nu tyi'tíj va'cán huaséj u tajapuá, arahua'puácaa nu huaséj i maj tajapuá tyí'huiire', a'íj mu jin antyúumua'reej maj arahua'puácaa jin puéjtzij huo'tá'an i ti jin néijmi'i tye'entyipúa'rij i Dios ti jime' nyú'camui'.

² A'yaa nu nyajta tyi'tíj tyu'séj ti naa tyí'me'estij, a'áa pu jo'muáanyijmee ti'ij jájtya'huaa i tiéj tzajta', a'áa mu jo'tyú'uuca'aj áarpaj metyi'tyai'ij a'íimaj i maj jaatyáamue'tij a'íjci i ti je'ej pua'aj huasé'rin, majta i tyévij ti jahuiire', majta i ti jin tyí'itej i ti jin antyapuaaj.

³ Majta a'íjna chuiicaca'aj je'ej ti huaríj i Moisés i ti tyí'huiiria'ca'aj i Dios jimi, majta a'íjna jime' je'ej ti huaríj i cánya'aj. A'yaa mu tijin:

Huápu'i'ij pu tyámua' naa huasé'rin je'ej paj
 tyi'tíj jin huaríj,
 tavástara', Dios mu paj néijmi'i jin
 antyía'mua'reej,
 tyámua' pu een ajta tzáahuatyi'ra'aj séejre' je'ej
 paj tyí'ijta,
 muáaj paj jusén jime' tyí'ijta.

⁴ ¿A'tanyíj quee muatzihnye' muéetzij tavástara'
 paj pué'een?

¿A'tanyíj quee tyimuaatatyójtzi're'ej?
 Ji'nye muáaj paj ji'rénnya'aj séejre',
 néijmi'i mu i tyeítjee mujo'vá'ju'uj muá'ju'un
 mej mij muatyáanajche,
 ji'nye pu'ríj huataséjre i paj jin tyí'ijta.

⁵ Nyati'ij nyij atányeeriaca', aj nu nyij jaaséj ti
 antácuunyica'aj i tyeyúuj tajapuá ti já'sejre'.

⁶ A'úu mu mij tyeyúuj tzajta' je'ráacij i
 maj tajapuá tyí'huüre' i maj aráahua'puaj
 ará'asej, majta jaa'á'sima'aj i puéjtzij i ti
 aráahua'puaj ará'asej. Cáanarij mu tyí'cheen
 ti naa tyi'tyataatiyi'ij, majta ahuoji'que'ejma'caa
 jutavíj jitze puásij jime' ooroj ti jin taavijhua.

⁷ Ajta síj i maj muáacuj i maj júurij,
 a'íi pu'ij túxa'aj tyihuo'rái'pu'tyej a'íjma i maj
 aráahua'puaj ará'asej i ti jitzán ava'ajistíjme'e i
 ti jin huápu'i'ij nyú'camui' i Dios i ti jusén jime'
 júurij.

⁸ Aj pu'ij tyámua' tyá'ajcitzujtariaca' u tyeyúuj
 tzajta' a'íjna jime' i muárie'ria'ra' i Dios, ti'quij
 tyámua' tyo'huájistyaca' u tyeyúuj tzajta' a'íjna
 i citzij, capu che' huatái'riitariaca' ti a'tíj
 utyájrutyey 'asta na'aj quee antyipua'rej je'ej

maj tyi'tíj jin puéjtzij tyihuo'tá'sij a'íimaj i maj aráahua'puaj ará'asej.

16

I túxa'aj ti a'íjna jin avá'jistij i ti jin Dios nyú'camui'

¹ Nyati'ij nyij nyúucarij huánamuajri' ti u tyeyúuj tzajta' ca'nyíin jin a'yan tyihuo'té'exaaj a'íjma i maj tajapuá tyí'huire' i maj aráahua'puaj ará'asej a'yan tijin:

—Séricuj, siata'aj ayo'cáxire'en i cháanacaj japua i ti avá'jistij i túxa'aj jitze i ti aráahua'puaj tya'rá'asej, i ti jin i Dios huápuí'ij nyú'camui'.

² Aj pu'ij síj ujo've'mej, ti'quij uye'cáaxirej i cháanacaj japua i túxa'aj jitze ti arámuaaca'aj, aj pu'ij a'íjma jimi i tyeítyee i ti hua' jitze á'yu'si'huaca'aj je'ej ti ántyapuaj a'íjna i tyi'tíj ti je'ej pua'aj huasé'rin, a'íjma jimi pu atzáj huataséjre i ti je'ej pua'aj curiá'rie', ajta je'ej pua'aj huasé'rin.

³ Ajtáhua'aj i síj i tajapuá ti tyí'huire', a'íi pu ajta uye'cáaxirej i túxa'aj ti jitze arámuaaca'aj, a'áa pu ya'ráaxirej i jájtyij japua ti ve'éj, aj pu'ij i jájtyij a'yan huataséjre ti'ij xúure'ej ti eerámui'yaca' i tyévi'j jitze ti huame'rej, aj mu mij néijmi'i huácuij i maj jájtyij jitze já'chajca'aj.

⁴ Ajtáhua'aj i síj ti tajapuá tyí'huire', a'íi pu ajta uye'cáaxirej a'íjna i ti túxa'aj jitze arámuaaca'aj i játya'naj japua, ajta jo'tij ja'ajéexavi'ijmee, aj pu'ij a'yan huaríj ti'ij i xúure'ej.

⁵ Nyajta a'yan tyáanamujri' a'íjci i tajapuá ti tyí'huiire' i ti a'íjna jin antyúumua'reej i jájtyij, ti a'yan tyu'taxájtaca' tijin:

—Muáaj paj tyámua' een, a'íj paj jin antyía'mua'reej pej pij huo'xíjtye'en, muáaj paj jájcuaj imuáj séjria'ca'aj, pajta ijíj pooj séejre',

⁶ ji'nye a'íimaj mu i tyétyacaa huo'cuij i maj muéetzij jimi tyámua' tyí'tyesejre', majta i maj muéetzij jitze ma'can tyí'xajtaca'aj, ajta ijíj paj muáaj huo'ta' mej mij xúure'ej huaye'en. Jujíimua'aj mu a'yan tye'entyimué'tij.

⁷ A'yaa nu nyajta tyáanamujri' ti a'tíj utyojo'taxájtaca' jo'tij jo'tyéjvee i maj japuan tyí'mu'vejritacaa, a'yan tijin:

—A'yaa pu tyi'ja'yájna tavástara' mu paj Dios pué'een, mu paj néijmi'i jin antyía'mua'reej, tzáahuatyira'aj paj jin huo'xíjtyej, pajta quee tyi'tíj jin ootyá'itzee.

⁸ Ajtáhua'aj síj i ti tajapuá tyí'huiire', a'íi pu ajta uye'cáaxirej i ti arámuaaca'aj i túxa'aj jitze, a'íj pu japua jaráaxirej i xicáj, ajta a'yan tyaatá' tí'ij i xicáj huo'tyátieeraj i tyeítyee.

⁹ Aj mu mij huápuí'ij huatyájttaa i tyeítyee, majta camu jaatáxaahuataca' i maj jin je'ej pua'aj ricij, camu majta tyaatatyójtzi'rej i Dios, sulu je'ej mu pua'aj tyaatajé i Dios, i ti a'íjna jin antyúumua'reej ti puéjtzij huo'tá'an.

¹⁰ Ajtáhua'aj i síj i ti tajapuá tyí'huiire', a'íi pu ajta uye'cáaxirej a'íjna ti jitze aráamuaca'aj i túxa'aj, a'íj pu japua jaráaxirej jo'tij ja'cájca a'íjna i tyi'tíj ti je'ej pua'aj een, aj pu'ij huápuí'ij huatyática'riaca' jo'tij tyejé'ijtaj. Majta i tyeítyee,

a'íi mu uhuóche've'ej i junyanúu jitze a'íjna jime' maj jéehua huápu'i'ij jajpuéjtzica'aj,

11 Camu majta jaatáxaahuataca' i maj je'ej pua'aj ricij, sulu je'ej mu pua'aj tyaatajé i Dios i ti tajapuá já'sejre', a'íjna jime' i maj jéehua jajpuéjtzica'aj.

12 Ajtáhua'aj síij i ti tajapuá tyí'huiire', a'íi pu ajta uye'cáaxirej i túxa'aj ti jitze arámuaaca'aj, a'áa pu ya'ráaxirej i játya'naj jitze ti ve'éj ti a'yan ántyapuaj tijin Éufrates, aj pu'ij atyáaxi' i játya'naj, mej mij antáciinyej a'íimaj i maj tyí'ijta i maj a'áa pujmua' jo'vá'ju' jo'tij jé'ejnyinyiij i xicáj.

13 Nyati'ij nyij huo'séj maj huéicaj ejnyéxij hua' tyenyij jitze a'íjna i cú'cu'uj, ajta a'íjna i tyi'tíj ti je'ej pua'aj huasé'rin, ajta a'íjna i ti hue'tzij jin tyí'xaj, a'yaa mu huasé'rihua'aj mati'ij taachuísee.

14 A'íi pu júuricamej pué'eenye'ej i maj tyiyáaru' jitze ajtyáma'can, a'íi mu ciinyaca'aj néijmi'que' i cháanacaj japua, mej mij huá'ajsiire'en a'íimaj i maj tyí'ijta, mej mij huatyényo'se'en a'ájna xicáara' tí'ij jitzán huataséjre'ej i Dios ti néijmi'i jin antyúumua'reej.

15 A'yaa pu tijin: “Cási', nyáaj nu uvé'nyesij tí'ij náhua'rij. Che' huatóotyamua've'en a'íjna i ti atányeej, ajta tyí'chajca tí'ij quee muá'vi'ij jo'cha'canye'en, mej mij quee i tyeítyee jaaséj i ti jutyevi'ra'.”

16 Majta je'en hua'ajsií néijmi'caa i maj tyí'ijta a'ájna a ti a'yan tyaja'rájtyapuaj huá'nyuucaa

jime' i hebreos tijin Armagedón.

¹⁷ Ajtáhua'aj síj ti tajapuá tyí'huiire', a'í pu ajta uye'cáaxirej i ti arámuaaca'aj i túxa'aj jítze, aj pu'ij síj ca'nyíin jin tyu'taxájtaca' ti uje'rávaaca'aj u tyeyúuj tzajta' a'ájna jo'tij jo'tyéjvee i maj japuan tyí'mu'vejritacaa, a'yaa pu tyu'taxájtaca' tijin:

—Pu'rij néijmi'i tye'entyipua'riaca'.

¹⁸ Aj mu mij huatyána'axcava'xij majta tyényuuc'a'aj, ajta jéehua tyi'tyáhuaasime'ej, i cháanacaj pu ajta ca'nyíin jin huatóoca'tzij, a'yájna ti'ij quee a'náj tyu'tóoca'tzij mati'ij mana'aj a'yan tyi'tyesejre' i tyeítjee.

¹⁹ Ajta a'ájna i chájta'naj ti ve'ej, huéicaque' pu ootátzi'tyaca', ajta á'vatzijxi i chájta'naj i séej chuéj japua ti já'ma'can, ajta i Dios pu jo'támua'reeri' a'ájna i chájta'naj ti ve'ej ti a'yan tyaja'rájtyapua'j tijin Babilonia, ti'ij puéjtzij jaatá'an ajta je'en jáaci'tyij i ti jin huápu'ij nyú'camui' i Dios.

²⁰ Ajta néijmi'i jo'tij ja'ráahuachij i jájtyij jítze, ajta jiríj ti huaquéetimee a'í pu néijmi'i tyaja'huóopua'rixij,

²¹ majta tyéetyee tajapuá je'cáavatzij maj tyatí'ti'ijmee a'íjma japua i tyeítjee, huá'puatyej quiiluj mu tyijetyejma'caa i tyéetyee, majta a'íjma'j i tyétyacaa, je'ej mu pua'aj tyaatajé i Dios a'ájna jime' i tyéetyee maj cáavatzij, ji'nye jéehua mu jajpuéjtzica'aj.

17

Dios pu jo'xíjtyej a'íjci i úitaj ti huóotoj

1 Aj pu'ij síij ti tajapuá tyí'huiire', ti ajta séej iityei'ca'aj i túxa'aj ti aráahua'puaj tya'rá'asej, a'íi pu mu jo've'mej, ti'quij a'yan tyinaaté'exaaj tijin:

—Mupo've'me', nyamuaataséejratye'sij je'ej ti tya'ajpuéetzij ta'mej a'íjna i íiti' ti jamue'tica'aj i túmii i jutyéviij jime', a'íi pu a'íin pué'een i ti a'áan jo'ojcaj i jájtyij japua ti ve'éj.

2 Majta a'íimaj i maj tyí'ijta i cháanacaj japua, a'íi mu huóoxana'cirej a'íjna jamuán i íitaj, majta a'íimaj i maj a'yan huacháatimee i cháanacaj japua, a'íimaj mu huatyáata'ruj a'íjna jime' ti i íiti' huo'ta' mej mij jamuán huóoxana'cire'en.

3 Ajta je'en i júuricama'ra' i Dios ti naataséjraj, a'íi pu i ti tajapuá tyí'huiire' nyojo'vi'tij a'ájna jo'tij quee já'tyi'tij. A'áa nu nyij íitaj huaséj ti i cú'cu'uj ti po'vij japua avá'catyii, ajta jéehua jitzán á'yu'si'huaca'aj i ti jin je'ej pua'aj tyá'xaj i Dios, arahua'puácaa pu íjmu'uj a'íjna i cú'cu'uj ajta tamuáamuata' pua'mácan ava'ahuájma'caa.

4 Ajta a'íjna i íiti' nacámuaa pu tyi'tyéhajcaa, ajta cíi tyí'po'vij, jéehua pu tyo'carújtya'ajma'caa a'íjna i ti ooroj jin tyí'taavijhua, ajta tyetyéj ti huápui'ij tyá'najchij, ajta peerla tyi'tíj. A'íi pu ajta túxa'aj iityei'ca'aj ti ooroj jin taavijhua, a'íj pu jitze avá'ajística'aj i ti xána'visi' huasé'rin, ajta i ti jin huóoxana'cirej a'íjna i íiti',

5 ajta cuátze' a'yan tyé'yu'si'huaca'aj i nyúucarij nyaj quee yo'itéej na'raa, a'yaa tyé'yu'si'huaca'aj tijin: “Babilonia, i ti va'cán jin

tyi'tyéjvee, ajta hua' náanaj a'íimaj i úucaa i maj jamue'tij i túmii i jutyéviij jime', ajta néijmi'i i ti je'ej pua'aj tyí'een íyan cháanacaj japua."

⁶ Aj nu nyij jaaséej ti i íiti' tahuáaca'aj a'íjna jime' i hua' xuure' i maj tyámua' tyí'tyesejre' i Dios jimi, majta a'íimaj i maj huácuij a'íjna jime' maj Jesús jitze ma'can tyí'xajtaca'aj. Aj nu nyij je'ej tyo'taséj nyati'ij jaaséej.

⁷ Ajta i tajapua' ti tyí'huiire', a'yaa pu tyi-naaté'exaa jijn:

—¿Ji'nye een jime' je'ej petyo'taséj? Nyáaj nu muaaté'exaatye'sij je'ej ti huatóomua'aj a'íjna i nyúucarij ti á'yu'si'ij i íiti' jitze, nyajta je'ej ti huatóomua'aj i ti japan avá'caj, a'íjna i ti arahua'puácaa íjmu'uj, ajta tamuáamuata' pua'mácan ti ava'ahuájmee.

⁸ A'íjna i tyi'tíj i paj jaaséej, a'íi pu anaquéej séjria'ca'aj, ajta íjij capu che' séejre', ajta óoche' pu eetaméj a'ájna jo'tij ja'tyácun ti'ij quee eexúj á'pua'rej. Majta a'íimaj i maj a'yan huacháatimee i cháanacaj japua, i maj quee á'yu'si'ij je'ej maj ántya'ruj a'íjna jitze i yu'xarij i maj jin júurij muá'ju'un, ti'ij na'aj tyu'tyátaavijhuaca' i cháanacaj, a'íimaj mu je'ej tyo'taséjraj mati'ij jaaséej a'íjna i tyi'tíj ti je'ej pua'aj huasé'rin, i ti aamí' séjria'ca'aj, ajta je'en quee che' aja'hua'taca'aj, ajta óoche' pu huataséjre'sij.

⁹ A'yaa pu amitéeria'aj ja'mej a'tíj ti tyojó'itej ti ajta tyámua' metyóomua'rej. A'íjna i ti arahua'puácaa íjmu'uj, a'yaa pu huatóomua'aj a'íjna i jiríj ti aráhua'puaj ará'asej ti japan áan

jo'ojcaj i íiti', a'yaa pu ajta huatóomua'aj maj aráhua'puaj ará'asej i maj tyí'ijta.

¹⁰ Mua'anxíviij i maj meríj huáacuii, síj pu ooj tyi'tíj jin tyi'tyéjvee, ajta i síj capu eexúj séejre'. Ajta tí'ij huataséjre'en capu jéehua á'tyeeren.

¹¹ Ajta i tyi'tíj tí je'ej pua'aj huasé'rin tí jájcuaj ímuáj séjria'ca'aj, ajta quee che' séejre', a'íi pu a'íin pué'een i tí aráhueeicaj, a'íi pu ajta hua'jítze ajtyáma'can i maj aráhua'puaj ará'asej, a'íi pu ajta néijmi'i á'pua'ren.

¹² 'Ajta a'íjna i tí tamuáamuata' pua'mácan ava'ahuájmee, a'íi mu a'íin pué'een i maj tamuáamuata' ará'asej i maj tyí'ijta, i maj quee xu tye'entyájrurij mej mij tyu'ta'íjtaj, majta móoche' mu ja'ancuriáa'sij mej mij séej ooraj á'tyeevi'in maj tyu'ta'íjtaj a'íjna jamuán i tyi'tíj tí je'ej pua'aj huasé'rin.

¹³ A'íimaj i maj tamuáamuata' ará'asej i maj tyí'ijta, néijmi'i mu juxa'aj mana'aj tyí'xaj, a'íj mu jin jaatátuiire'sij i maj jin antyúumua'reej a'íjci i tyi'tíj tí je'ej pua'aj huasé'rin.

¹⁴ A'íi mu mij jaatanyo'si'tye'ej a'íjci i cánya'aj, ajta a'íi pu i cánya'aj huo'tyámue'tíj, majta a'íimaj jamuán séejre' i Dios tí huo'tajé ajta je'en hua'antyíhuoj mej mij tyámua' eenye', jí'nye i tavástara' pu tyihuá'íjtye' a'íimaj i maj hua'vástara' pué'een i tyeítyee, ajta a'íin pué'een i tajtúhuan tí néijmi'caa tyí'íjtye' i séecan i tajtúhuaanyij.

¹⁵ A'yaa pu ajta tyinaaté'exaaaj i tajapuá tí tyi'huiire' tíjin:

—A'íjna i jájtyij ti ve'ej i paj jaaséej, i ti japuan anjo'ojca'tyii i íiti' ti jaamué'tij i túmii i jutyévira' jime', a'íi mu a'ín pué'een i tyeítyee i maj séej chuéj japua já'ma'can, i maj séej nyúucarij jin tyí'xaj, majta séej chájta'naj jitze ja'chej.

¹⁶ Ajta a'íjna i a'huáara' tamuáamuata' ti ará'asej i paj jaaséj, ajta a'íjna i ti je'ej pua'aj huasé'rin, a'íi mu jájcha'íiria'aj muá'ju'un a'íjci i íitaj ti jaamué'tij i túmii i jutyévira' jime', a'íi mu ayooriésij metya'cá'ri'ran i ti tyi'tyéechan, majta je'en jaatyáci'mij i tyévira' mati'ij mij jaatyáteeraj.

¹⁷ Dios pu arí a'yan tyihuo'cámua'riityej hua' xiéjnyu'caa tzajta' mej mij a'yan huárinyij je'ej ti a'ín tyá'xie've', a'íj mu jime' juxa'aj mana'aj rinyij mej mij jaatátuiire'en a'íjci i tyi'tíj ti je'ej pua'aj huasé'rin i maj jin antyúumua'reej, 'asta na'aj quee a'yan atyojo'ré'nyej je'ej ti i Dios arí tyu'taxájtaca'.

¹⁸ Ajta a'íjna i íitaj i paj jaaséej, a'íi pu a'ín pué'een i chájta'naj ti ve'ej i ti tyihua'íjtye' néijmi'que' i cháanacaj japua.

18

A'íjna i Babilonia ti jó'vej

¹ Nyati'ij nyij nyajtáhua'aj séej huaséj i ti tajapúa tyí'huiire' ti jútye' aje'cáma'ca'aj, va'cán pu jin antyúumua'reej, néijmi'que' pu i cháanacaj japua huanyéeri'cij ja'raa a'íjci jime' i ti á'taaca'aj i jujitzé.

² A'yaa pu ca'nyín jin tyí'jijhuaca'aj tijin:

—Pu'ríj á'vej, pu'ríj á'vej a'íjna i Babilonia i chájta'naj ti ve'éj. Pu'ríj hua' chi'ij pué'een a'íimaj i tyiyáaru', jo'maj ja'chej i júuricamej i maj xána'visi' huasé'rin, ajta jo'maj já'asacaa i pína'see i maj xána'visi' huasé'rin, majta tyi'tyán i tyaj quee hua'xie've'.

³ Ji'nye néijmi'i mu i maj séej chuéj japua já'ma'can huatyáata'ruj mej mij je'ej pua'aj huárinyij ti'ij a'íjna i Babilonia, a'íimaj i maj íyan tyi'ijta i cháanacaj japua, néijmi'i mu jamuán huóoxana'cirej, majta i maj tyi'to'raaa íyan cháanacaj japua, a'íi mu huochíjtyaanyi'taca' a'íjna jime' ti a'ín a'yan tyihuo'tá' je'ej maj tyi'tíj tyi'xie'va'ca'aj.

⁴ Nyati'ij nyij nyajtáhua'aj séej nyúucarij huánamuajri' ti jútye' tyajá'xajtaca'aj a'yan tijin:

—Siata'aj eeráciinyej i chájta'naj jitze, mua'aj mu siaj nyetye'ítyeristyamua' pué'een, siaj sij quee hua' jamuán huóoxana'cire'en, ti'ij quee ajta jamuáaci'tyij i puéjtzij,

⁵ Ji'nye a'íi pu arí huápu'i'ij ootyá'itzee i Dios jimi, a'íi pu i Dios jamua'reej i ti jin je'ej pua'aj tyi'tyúucha'ij a'íjna i íiti'.

⁶ Che' a'yan ajta tyáaci'tyij ti'ij ajta a'ín puéjtzij tyihuo'tá' i ti huo'mué'tij, che' hua'puaj tyu'nájchitaj i ti jin je'ej pua'aj huaríj, siajta i váasuj ti jitzán jaya'caa siata'aj ja'vá'jsten a'íjna jime' i ti hua'puaj ará'asej i ti jin huatyátahuan, a'yájna ti'ij a'ín séecan tyu'tá',

⁷ siata'aj puéjtzij jaatá'an ti'ij hu-atóoxaamujritye'en, a'yájna ti'ij jusíj tya'huóotzaahuaj, ajta je'ej ti tyu'tóosejrataca'.

Ji'nye a'yaa pu tyí'xaj i jutzájta' tijin: "A'yaa nu tyi'tyéjvee tí'ij íiti' tí tyí'ijta. Canu antyínyasiijtariaca', canu nyajta jajpuéetzij na'mej."

⁸ A'íj pu jin séej xicáj japuan rávesij i tí jin jajpuéetzij ja'mej, aj pu'ij tyi'ijcuí'nyij, ajta huatóoxaamujritye'ej, ajta huataí'cuataj, aj pu'ij huatyáteeri'huaj, ji'nye i Dios néijmi'i pu putyí'uurej, a'íi pu i tavástara' a'yan puéjtzij tyaata'sij.

⁹ A'íimaj i maj tyí'ijta i cháanacaj japua, i maj jamuán huóoxana'cirej, majta jamuán huochíjtyanyi'taca', a'íi mu juyiinyen majta huatóoxaamujritye'sij mati'ij jaaséej tí ájcituzj a'íjna jime' tí tyátaasij.

¹⁰ Majta a'ímuáj jo'tya'úuj muá'ju'un a'íjna jime' maj jatzíinye' i tí jin jajpuéjtzij, a'yaa mu tyu'taxájtaj tijin:

—¡Cuí' xaa! ¡Cuí' xaa muáaj mu paj chájta'naj pué'een tí ve'éj, Babilonia mu paj va'cán jin antyía'mua'reej! Ji'nye jiye'tzín tya'rá'aj i paj jin períj jajpuéjtzij.

¹¹ Majta i maj tyí'to'raciaa íiyan cháanacaj japua, a'íi mu majta juyiinyen majta huatóoxaamujritye'ej a'íjna jime' i chájta'naj, ji'nye capu che' ma' a'tíj ta'mej tí tyihuó'nanieej i maj tyú'tisij,

¹² tipua'aj ooroj, pláataj, i tyetyéj tí tyámua' tyá'najchij, tyi'tíj peerla, cáanarij tí tyi'jí're'en i tí tyí'me'estij, na'ríj tí táxie'muaa, nusu i tí po'vij, ajta néijmi'i i ciyéj tí jéehua tyá'najchij, na'ríj

tyi'tíj coobre, nusu tyapúusti', nusu i tyetyéj i maj tyi'cámejtyee,

¹³ nusu i cue'ráj maj tyí'na'chityaa i ti naa tyaarie'ej, nusu i íjcuca na'ríj tyi'tíj miirra, nahuáj, aséityij, aríinaj ti jí're'en, tyeríicuj, ajta ya'muáatyee i maj hua' japuan tyí'ti'ijcicaa, nusu cánya'xií, cahuáayu'uj, i cariaáata', majta a'íimaj i maj ca'nyéjrij jin tyí'muarie' juxa'aj tyeítyee jimi.

¹⁴ A'yaa mu tyaatájeevij a'íjci i chájta'naj tijin:

—¡Capu che' séeria'aj ta'mej muéetzij jimi a'íjna i táque'ej ti jéehua mua'ránajchica'aj, papu'ríj jusén jin tyojo'riej i ti huápu'i'ij tyá'najchij i paj jin chíjtyaanyi'taca'aj!

¹⁵ Majta a'íimaj i maj a'yan éenye'ej tyí'tooca'aj majta a'íjna jin huochíjtyaanyi'taca', a'íi mu a'imuáj jo'tya'úuj muá'ju'un, a'íjna jime' maj jatzíinye' i ti jin jajpuéjtzij, muyíinyaj majta juxaamúuiritya'aj,

¹⁶ a'yaa mu tyi'xáataj muá'ju'un tijin:

—¡Cuíi' xaa! ¡Cuíi' xaa i chájta'naj ti ve'ej! I ti a'íjna tyi'tyéechan i ti me'estíj ti naa een, ajta a'íjna jime' i ti táxie'muaa, ajta i ti po'vij jime', ajta a'íjna tyo'carújtye'ejmee i ti ooroj jin tyí'taavijhua, ajta i tyetyéj ti huápu'i'ij tyá'najchij, ajta a'íjna i peerla tyi'tíj;

¹⁷ ¡ajta jiyé'tzín néijmi'i tyu'riá'xij i ti huápu'i'ij tyá'najchica'aj!

Majta néijmi'i a'íimaj i maj báarcuj ty-imuárie'rij, majta i maj tyí'muijhuacaa i báarcuj jitze i maj á'ciínyej i jájtyij japua, majta néijmi'i i maj hue'tyéé vivi', a'íi mu a' imuáj jo'huístiraa,

18 ajta mati'ij jaaséej a'íjci i citz'ij ti ájcitzujtariaca' ti'ij tyátaasima'aj i chájta'naj, aj mu mij a'yan tyityeetyejíihuajraa tijin:

—¿Jo'nyij ajtáhua'aj síj chájta'naj já'sejre' ti'ij a'mújna?

19 Aj mu mij chu'ej ti mu'inyij ahuóoratziraxij i jumu'új jitze, muuyínyaj majta jux-aamúuiritya'aj, a'yaa mu tyí'tyējijhuaca'aj tijin:

—¡Cuí' xaa! ¡Cuí' xaa a'íjna i chájta'naj ti ve'ej! A'íj mu jin huochíjtyaanyi'taca' muéetzij ti jimi tyí'sejre', néijmi'i i maj báarcuj tyíya'muaaca'aj i maj jin antac'ca'aj i jájtyij japua. A'íj mu mij jiye'tzín jó'vej.

20 Ajta i tajapuá siaj já'sejre', siata'aj hu-atóotyamua've'en, a'íjna jime' i chájta'naj, siata'aj huatóotyamua've'en mua'aj mu siaj ji'r'é'nye'ej séejre' i Dios jimi, siajta mua'aj mu siaj antyíhuaviihuaca', siajta mua'aj mu siaj Dios jitze ma'can tyí'xaxa'aj, néijmi'i xu huatóotyamua've'en, ji'nye ti'ij i Dios jo'xíjtyej a'íjci i íitaj, aj pu mua'ajmaj tyámua' tya-jamo'xá'pui'íntari'ri'.

21 Aj pu'ij síj ti tajapuá tyí'huiire' tyetyej pu tyítii i maj jin tyá'ti'xicaa, aj pu'ij ja'tyájríee i jájtyij jitze ti ve'ej, a'yan tyi'xáataj tijin:

—A'yaa paj cha'taj atyojo'cárutyij muáaj chájta'naj paj ve'ej Babilonia paj ántyapuaaj, camu mij che' a'náj muasejran.

22 Camu che' namuáaria'aj muá'ju'un i maj tyí'cui'nacaa i áarpaj jitze, nusu i maj tyí'ci'sityee túuturu'uj jitze, na'ríj i trompéetaj jitze, camu majta che' tyi'muárie'ej muá'ju'un je'ej maj tyi'tíj

tyu'yí'tin, capu ajta che' namuáaria'aj ta'mej i maj tyí'tixicaa.

²³ Capu che' a'táaj ja'mej muéetzij jimi i tiéj ti' u'taa i hua' chi'ij tzajta', capu ajta che' namuáaria'aj ja'mej i maj tyí'ye'estyaa a'íimaj i maj moochán huanyéjnye'i'chaca'. Ji'nye a'íimaj i maj tyí'to'racaria'aj mu a'íin pué'eenye'ej i maj a'yan japuan séjria'ca'aj i cháanacaj, i maj majta viváajma'aj jin tyityatatyá'ca'aj, i paj muáaj huo'cuanamuj mati'ij mana'aj pua'máj a'yan séejre' i cháanacaj japua.

²⁴ Ji'nye a'íjna jitze i chájta'naj a'íj mu jitze jáatyoj i hua' xuure' i maj Dios jitze ma'can tyí'xaxa'ta'aj, majta i maj ji'r'é'nye'ej séjria'ca'aj i Dios jimi, majta néijmi'i mati'ij mana'aj pua'máj huácuij i cháanacaj japua.

19

I maj tyí'chuiicaj u tajapúa

¹ Aj nu nyij tányij huó'namuajri' i maj tajapúa ca'nyíin jin mui'tíj tyajá'xajtaca'aj, a'yaa mu tíjin:

¡Alelúuyaj! Tyiche' tyaatatyójtzi're'en i Dios, ji'nye a'í pu tajapúa huatanyúj, a'íj pu ajta jimi já'ma'can i ti naa huasé'rin, ajta i ti jin néijmi'i putyí'uurej,

² a'í pu tzáahuatyí'ra'aj jin huá'xijtye'en, ajta je'ej ti tye'tyévijtye';

a'í pu arí jo'xíjtyej a'íjci i íitaj ti jutyévira' jin jamue'tica'aj i túmii, ajta ca'nyíjra'aj huo'ta' néijmi'que' i cháanacaj japua,

mej mij jamuán huóoxana'cire'en.

Dios pu'ij a'íjna puéjtzij jaatá' a'íjna jime' ti i íiti'
huo'cuij a'íimaj i maj jahuiire' i Dios.

³ Majtáhua'aj mu a'yan tyu'taxájtaca' tijin:

—¡Alelúuyaj! A'íjna i ti jitzán ájcitzuj i íitaj
capu a'náj huatyápua'rij.

⁴ Majta a'íimaj i huásaj i maj seityéj japuan
muáacuj ará'asej, majta i maj muáacuj i
maj júurij, néijmi'i mu ecóotutaxij, mej mij
jaatyánajche i Dios, i ti acájca ipuárij jitze.
A'yaa mu tyí'xajtaca'aj tijin:

—¡Che' a'yan tyá'ra'nyij! ¡Alelúuyaj!

⁵ Aj pu'ij síj huajjúhuaca' ti a'áa véjri'
jo'tyávaaca'aj jo'tij jo'tyéjvee i maj japuan
tyí'mu'vejritaca, a'yaa pu tyí'xajtaca'aj tijin:
Siata'aj tyaatatyójtzi're'en i Dios, néijmi'i mua'aj,
mu sij viváajma'aj jin tyityatatyíj,
sijta mu sij ciléenye' jin tyityatatyíj,
néijmi'i mua'aj mu sij jahuiire' sijta
tzáahuatyí'ra'aj jimi tyícha'ij.

Tí'ij huatyényeichij i Cáyaa'aj

⁶ A'yaa nu nyajta tyihuó'namuajri' maj jéehua
i tyeítyee tyí'xajtaca'aj, a'yaa pu namuajria'ca'aj
tí'ij jo'tij jájtyíj ja'ancáamuí'yej, ajta a'yan na-
muajria'ca'aj tí'ij i víityee maj tyényuucan.
A'yaa mu tyí'xajtaca'aj tijin:

¡Alelúuyaj! Tyiche' tyaatatyójtzi're'en i Dios,
ji'nye pu'ríj huatyóochej ti tyu'ta'íjtaj i
tavástara',
ajta i Dios i ti néijmi'i jin antyúumua'reej.

⁷ Tyiche' huátatyamua've'en, tyajta
tyaatatyójtzi're'en,

ji'nye pu'ríj a'ájna atyojo'r'é'nyej tí'ij i cánya'aj huatyényeichij.

Ajta i tí íira'ra'an pué'eenye'ej ta'mej pu'ríj ajta tyámua' huóoruuj.

⁸ A'yaa mu tyaatá' tí a'ájna tyu'tyóchejtjej i cáanarij tí me'estíj tí ajta naa een, tí tyama'astáji'ij tí quee choomua.

Ji'nye a'ájna i cáanarij tí naa een, a'íi pu pué'een i maj jin tyámua' tyityetyúucha'íica'aj a'íimaj i tyeítysteristyamua'me'en i Dios.

⁹ Ajta i tí tajapuá tyí'huíire' a'yaa pu tyinaaté'exaaj tíjin:

—Ootyéeyu'xaj a'yan tíjin: “Miche' huatóotyamua've'en a'íimaj i maj huo'tá'inyej mej mij jamuán tyú'cua'nyij i cánya'aj a'ájna xicáara' tí jitzán huatyényeichij.”

A'yaa pu ajta tyinaaté'exaaj tíjin:

—A'ájna i nyúucarij nyaj mua'ixaatye' Dios pu ji'r'é'can jime' janyuucaa.

¹⁰ Aj nu nyij tyítunutaca' jo'tíj ja'ra'íicajmee nyej nyij jaatyáanajche, aj pu'ij a'yan tyinaaté'exaaj tíjin:

—Capáj a'yan rijcaj, ji'nye nyáaj nu jahuíire' i Dios, a'yájna patí'ij muáaj majta a'íimaj i a'ihuáamua' i maj a'yan ricíj je'ej tí i Jesús tyihuó'ixaa. Pata'aj i Dios huatyáanajchej.

Ji'nye a'yájna tí'ij tyu'xájtaca' i Jesús, a'íi pu a'íin pué'een i tí huo'cámua'riityej a'íimaj i maj Dios jítze tyí'xájtaca'aj.

A'ájna i tí avá'caj i cahuáayu' japua tí cuéinara'

11 Aj nu nyij jaaséej ti antácuunyica'aj u tajapuá, aj pu'ij cahuáayu' huataséjre ti cuéeinara', ajta i ti avá'caj a'yaa pu ántyapuaj tijin I ti tyámua' een ti ajta tzáahuatyí'ra'aj jin tyí'xaj, ji'nye tyámua' pu tyí'ijta'ca'aj, ajta a'yan cha'taj tyí'nyo'sa'ca'aj.

12 A'yaa pu huasé'rihua'aj i ji'sáara' ti'ij tiéj ti á'taa, ajta mui'caa tyo'carújtya'ajma'caa i cúruun i jumu'új jitze, ajta jitzán á'yu'si'ij je'e'j ti a'ín ántyapuaj, ajta a'ín na'aj jusíj yó'itej.

13 Ajta i cáanarij ti tyí'chajca'aj xúure'e'j pu jéehua a'ma'ca'aj, ajta a'yan ántyapuaj tijin I Nyúucaria'ra' i Dios.

14 Majta cújta' huajú'ca'aj i xantáaru' maj tajapuá já'ma'can, cuéeinavi' metyi'cháaj ti tyi'tyama'astáji'caa ti ajta huápu'i'ij tyi'jí're'en ajta quee tyí'choomuavi'ca'aj, majta je'en cahuáayu'uj japua ave'tye'tya'ajma'caa maj cueinaa.

15 Ajta i tyényi'tze' náhuaaj pu éejnyinyiica'aj ti huápu'i'ij tyí'itzij, ti'ij jin tyihuo'puéjtye'en i néijmi'caa i tyeítjee i maj a'yan séejre' i cháanacaj japua. Ca'nyéjrij pu jin tyihuo'ta'íjtye'sij. Ajta a'ín hua' japua jaráriesij i ti jin huápu'i'ij nyú'camui' i Dios ti néijmi'i jin antyúumua'reej.

16 Ajta i máancajra'an jitze, huárita' pujmua' a'yaa pu tyé'yu'si' tijin: "Hua' tajtúhuan i tajtúhuaanyij, ajta i ti tyihua'íjtye' i maj tyí'ijta."

17 Nyajta je'en séej huaséj i ti tajapuá tyí'huire', a'áa pu jo'tyávaaca'aj i xicáj jitze, a'yaa pu ca'nyíin jin tyihuo'tajé néijmi'caa i pína'see i maj jútye' ra'ra' tijin:

—Siata'aj mujo'vá'ju'un siaj sij tyú'cua'nyij i Dios ti tyaja'muacue'tyen,

18 siaj sij jáacua'nyij i huá'hue'ra' a'íimaj i maj tyí'ijta, i maj tyihuá'ijtye' i xantáaru', siajta i huá'hue'ra' i tyétyacaa i maj jéehua uhuácaca'nye', siajta huá'hue'ra' i cahuáayu'uj, majta i maj ave'tye'tya'ajma'caa, néijmi'i i huá'hue'ra' i tyétyacaa, i maj juxáahuaj ciinyej, nusu i maj ca'nyéjrij jin tyí'muarie', i maj ciléenye' jin tyityatatyíj, nusu i maj va'cán jin tyí'huüre'.

19 Nyati'ij nyij jaaséej a'íjci i ti je'ej pua'aj huasé'rin nyajta i maj tyí'ijta i cháanacaj japua hua' jamuán i juxantáaru'ustyamua', maj aja'tyúusiiria'ca'aj mej mij jaatanyo'si'tye'en a'íjci i ti avá'caj i cahuáayu' japua, majta i xantáaru'ustyamua'mua'.

20 Ajta a'íjna i tyi'tíj ti je'ej pua'aj huasé'rin, a'íj mu huatyéevi', majta jamuán a'íjna i ti hue'tzij jin tyí'xajtaca'aj a'íjna jitze ma'can, i ti ajta jitzán ma'can jéehua tyu'muáriej. A'íj pu jin huo'cuanamuj a'íjna i ti jitzán ma'can hue'tzij jin tyí'xajtaca'aj, a'íjma i maj huatóoa' maj hua' jitze jo'yú'xaj je'ej ti ántyapuj a'íjna i tyi'tíj majta jaatyánajchaca'. Aj pu'ij a'íjna i tyi'tíj ti je'ej pua'aj huasé'rin, ajta i ti hue'tzij jin tyí'xajtaca'aj a'íj mu huavívi'ri'huaca', mati'ij mij a'áa huaja'tyáahua'xij júurican jo'tij ja'alaguun ti asúufrej jin á'taa.

21 Majta i séecan a'íj mu huácu'i'iihuaca' a'íjna jime' i chúun ti éejnyinyiica'aj i tyényi'tze' a'íjna i ti cahuáayu' japua avá'caj, majta néijmi'i i

pína'see tyámua' mu tyityaatajú'xaj a'íjna jime' i huá'hue'ra' i maj huácuij.

20

Ciríistu' pu tyu'ta'íjtaj séej ví'ra'aj nyinyi'ra'aj

¹ Séej nu huaséj i ti tajapuá tyí'huiire' ti jútye' aje'cáma'ca'aj, ajta yáavij huáchuisima'aj i ti jin ja'tyáanaj jo'tij ja'tyácun ajta cadéenaj huapísime'ej ti vivéj.

² Aj pu'ij jaatyéevi' a'íjci i cú'cu'uj, a'íjna i ti jájcuaj imuáj huataséjre, i ti a'íin pu'éen i tyiyáaru', aj pu'ij jaatyáaji'quej ti'ij séej ví'ra'aj nyinyi'ra'aj jí'qui'huaj.

³ Aj pu'ij a'áa ye'tyájrree jo'tij ja'tyácun, ajta je'en ja'tyáanaj ta'aj ij quee che' huá'cuanamuaj i maj séej chuéj japua já'ma'can 'asta na'aj quee mutyojo'me'en séej ví'ra'aj nyinyi'ra'aj, aj pu'ij té'ej caira'tzuj tyu'tátuihuaj.

⁴ Nyati'ij nyij ipuárij tyu'séj, a'íjma mu jitzán acátye'tya'aj i maj ja'ancuriáa' mej mij huo'xíjtye'en i tyeítýee. Nyajta je'en hua' júuricamej huaséj a'íjma i maj hui'ijveechixij i hua' mu'uj a'íjna jime' maj tyámua' éenye'ej i Jesús jimi, majta a'íjna jitze i nyúucaria'ra' i Dios. A'íimaj i maj quee jaatyánajchaca' a'íjci i ti je'ej pua'aj huasé'rin camu majta i ti jahuiire', majta quee huatóoa' maj hua'ajtyiyú'xaxi'in i huá'cuaatze' nusu i jumuáca' jitze. Aj nu nyij huo'séj maj huatájuuriaca' majta je'en jamuán tyu'ta'íjtaca' i Ciríistu' séej ví'ra'aj nyinyi'ra'aj jitze.

5 Majta i séecan i maj huácuij, camu huatájuuriaca' 'asta na'aj quee mutyojo'mej séej ví'ra'aj nyinyi'ra'aj. A'íi mu a'íin pué'een i maj anaquéej huatájuuriaca'.

6 Miche' huatóotyamua've'en a'íimaj i maj hua' jamuán anáatya'aj huatájuurij, ji'nye a'íijma mu jitze ajtyáma'can i tyeítyeristyamua'me'en i Dios. Majta quee che' cui'nyij, sulu a'íi mu tyitye'entyárutyij i Dios jimi, majta i Ciriistu' jimi, mej mij séej ví'ra'aj nyinyi'ra'aj jamuán tyu'ta'íjtaj.

Dios pu ja'antyimué'tij i tyiyáaru'

7 Ti'ij mutyojo'me'en i séej ví'ra'aj nyinyi'ra'aj, a'íi pu i tyiyáaru' huatátuihuaj jo'tij je'tyánami'huaca'aj,

8 aj pu'ij eetaméj ti'ij huo'cuanamuan a'íijma i maj séej chuéj japua já'ma'can, i maj a'áa jo'cháatimee jo'tij i xicáj jé'ejnyinyiij, majta i maj a'áa pujmua' jo'cháatimee jo'tij i xicáj ja'ancáru'pij, majta i maj ajtyapuáj pujmua' jo'cháatimee, majta i maj áatyej pujmua' huacháatimee, ajta a'íjci i ti a'yan ántyapuaaj tijin Gog, ajta a'íjci i Magog, majta néijmi'caa i maj hua' jitze ajtyáma'can i maj a'yan ará'asej ti'ij i séj ti a'áa ja'ajtyájcaj jo'tij ja'va'ástimee i jájtyij ti ve'éj, a'íijma mu mij tyísiire'ej mej mij huatyényo'se'en.

9 Mati'ij mij néijmi'que' oorióonajchaca' ti'ij na'aj ooyóhuaj i chuéj, mati'ij mij hua'ajnáj jo'maj tyojo'tyá'inaamuarica'aj i maj tyámua' een i Dios jimi, a'íijma i Dios ti hua'xie've'. Ajta

tiéj pu uje'cájvej u tajapuá, ti'quij huo'tyáatiej a'íjma i maj jamuán huajú'ca'aj i tyiyáaru'.

¹⁰ Ajta i tyiyáaru', i ti huo'cuanamuj, a'áa pu ja'tyáreehuaca' jo'tij ja'alaguun ajta já'taa i asúufrej jime', jo'maj majta ja'tyáavatzij a'íjna i ti je'ej pua'aj huasé'rin ajta a'íjna i ti jahuiiria'ca'aj, ajta a'íjna i ti hue'tzij jin tyí'xajta'ca'aj. A'áa mu mij jajpuéetzij muá'ju'un tújca majta tíca' majta jusén jime'.

Dios pu huá'xijtye'en a'ájna jo'tij já'sejre' i ipuárij ti ve'éj

¹¹ Nyati'ij nyij ipuárij huaséj ti ve'éj ti naa tyí'cuenara', nyajta a'íj huaséj i ti acájca. Ajta i cháanacaj, ajta i tajapuá, a'áa pu ja'huópua'rixij a'íjna jimi, camu che' ma' já'sejria'ca'aj.

¹² Nyajta je'en a'íjma huaséj i maj huácuij, i maj huásij majta i maj cíleen, a'áa mu ja'riá'vaaca'aj a'íjna jimi i ipuárij, aj mu mij séej ootácuuraca' i yu'xarij, majtáhua'aj séej ootácuuraca' i yu'xarij i maj jitzán á'yu'si'ij je'ej maj ántya'ruj i maj júurij huatyá'itzeere'ej i Dios jimi. Majta a'ímaj i maj meríj huácui'ijcaa a'yaa mu tyityo'xíjtyi'huaca' je'ej maj tyi'tíj huáruuj mati'ij móoj júurica'aj, majta je'ej ti tyé'yu'si'huaca'aj i yu'xarij jitze.

¹³ Aj mu mij huataséjre i maj atyájcuii i jájtyij jitze, majta néijmi'i i séecan i maj huácui'ijcaa, néijmi'i mu majtáhua'aj huatájuuriaca', aj pu'ij Dios huo'xíjtyej a'íjna jime' je'ej maj tyi'tíj jin huaríj mati'ij móoj júurica'aj.

14 Ajta je'en a'íjna i ti tyí'tyacui'caa a'áa pu ja'tyáreehuaca' jo'tij ja'alaguun ajta á'taa asúufrej jime'. A'íi pu a'íin pué'een i maj majtáhua'aj jin cui'nyij,

15 a'áa mu majta huaja'tyáahua'xij i maj quee áyu'si'huaca'aj je'ej maj ántya'ruj i yu'xarij jitze ti hua'tá'caa maj jusén jin júurij hu- atyá'itzeere'en i Dios jimi.

21

A'íjna i tajapuá ti já'sejre' ti jájcuaj ajta i cháanacaj ti ajta jájcuaj

1 Aj nu nyij tányij i tajapuá huaséj ti jájcuaj, nyajta i cháanacaj ti ajta jájcuaj, ji'nye a'íjna i tajapuá ti anaquéej séjria'ca'aj, ajta a'íjna i cháanacaj ti mí'ma'can, capu che' séjria'ca'aj, ajta i jájtyij ti ve'ej, capu ajta che' séjria'ca'aj.

2 Nyajta je'en jaaséj i chájta'naj ti jájcuaj ti ajta naa een i ti a'yan ántyapuaj tijin Jerusalén, ti jútye' aje'cáma'ca'aj jo'tij i Dios já'sejre'. Tyámua' pu huóoruuj a'íjna i chájta'naj ti'ij i íiti' ti huatyéviche'sij.

3 Nyajta je'en nyúucarij huánamuajri' ti ca'nyíin jin a'áa tyojo'taxájtaca' jo'tij i ípuárij jo'tyávaaca'aj, a'yaa pu tyí'xajtaca'aj tijin:

—Iiye'ej pu putyí'ricij jo'tij já'sejre' i Dios hua' jamuán i tyétyaca. Hua' jamuán pu huatyá'itzeere'ej, majta a'íimaj mu tyeítyeristyamua'me'en pue'éenye'ej muá'ju'un. Ajta i Dios a'íi pu hua' Dios pué'eenye'ej ta'mej.

4 Tyámua' pu tyihuo'tyéjeevij mej mij quee che' juxaamuíjritya'aj, camu che' cui'nyij, camu

che' juxaamúuiritya'aj muá'ju'un a'íjna jime' tì síij huamuí', camu majta che' juyiinyaj muá'ju'un, camu che' tyi'tíj jin jajpuéetzij muá'ju'un, ji'nye a'íjna i tì aamí' tyí'sejria'ca'aj capu che' tyi'séere'ej ta'mej.

⁵ Ajta a'íjna i tì ipuárij jítze acájca a'yaa pu tyu'taxájtaca' tijn:

—Nyáaj nu néijmi'i tyi'jajcuare'en i tì tyí'sejre'.

Ajta a'yan tijn:

—Ootyéeyu'xaj a'íjci, ji'nye a'íi pu nyúucarij tzáahuatyí'ra'aj jin tyí'xaj, ajta i'ríj siaj jitzán tyú'ca'nyej.

⁶ Aj pu'ij a'yan tyinaaté'exaaj tijn:

—Pu'ríj tye'entyíci'piihuaca'. Nyáaj nu a'íin pué'een i nyaj anájcaj, nyajta i nyaj uvé'tyajtíj, nyáaj nu jájcuaj imuáj huataséjre, nyajta jusén jime' séeria'aj na'mej. A'tíj tina'aj tì huataí'imu'un nyáaj nu huáapua'aj jaatá'sij a'íjci i jájtyij tì a'áa já'ajnyinyii jo'tij ja'ajréxaj, a'íjna i jájtyij i tì jin júurij ja'mej jusén jime'.

⁷ Ajta a'íjna i tì tyu'tyámue'tin, néijmi'i pu a'íjna tyá'ci'tyij, nyáaj nu Dios ra' pue'éenye'ej na'mej, ajta a'íi pu nyiyóoj pue'éenye'ej ta'mej.

⁸ Majta a'íimaj i maj je'ej pua'aj tyityetyúucha'ij, i maj quee tyá'tzaahuatyé', i maj tyú'xana've', i maj tyí'tyacui'caa, i maj úucaá jamuán juxana'cire', i maj tyí'chahuaa, i maj sáanturij najchej majta i maj tyí'hue'tacaa, a'yaa pu tyihuá'ci'tyij maj a'áa jo'tyá'itzeere'en jo'tij ja'alaguun tì asúufrej jin á'taa, a'íi pu a'íin pué'een i maj jin majtáhua'aj cui'nyij.

I Jerusalén tì jájcuaj

⁹ Aj pu'ij sáij nye jimi aje're'nyej i ti tajapuá tyí'huüre' ti hua' jitze ajtyáma'can i maj aráahua'puaj ará'asej, i maj túxa'aj tyi'tyái'pu'ca'aj i ti ajta aráahua'puaj tya'rá'asej, i ti jitzán arámuaaca'aj i cui'nyi'ra'aj i maj jin jajpuéjtzica'aj i tyeítýee, a'yaa pu tyinaaté'exaaj tijin:

—Mujo'té'yi'ij, nyáaj nu muaataséjratye'sij a'íjna i ti jimí tya'tóoraj i cánya'aj ti ajta íira'ra'an pue'éenye'ej ta'mej.

¹⁰ Ajta je'ej ti tyinaataséjra i júuricama'ra' i Dios, a'íi pu i ti tajapuá tyí'huüre' nyo-joovi'tij jo'tij jiríj jo'tácaj ti huápuí'ij ájtyeej, aj pu'ij naataséjraj i chájta'naj ti naa een i ti a'yan ántyapuaj tijin Jerusalén, a'áa pu jútye' je'cáma'ca'aj jo'tij i Dios já'sejre'.

¹¹ Naa pu tyi'tyama'astáji'caa a'íjna i chájta'naj ti'ij ajta i Dios ti huápuí'ij naa huasé'rin, a'yaa pu tyi'tyataátiyi'caa ti'ij i tyetyéj ti huápuí'ij tyá'najchij, ti'ij ajta tyí'tatzaj a'íjna i cristal.

¹² Va'tíj pu jin curiá'nami' ajta tyámua' tyé'ejtyee, tamuáamuata' japuan hua'puaj pu ará'axcaa jo'tij ja'pueertaj, ajta jo'tij ja'pueertaj tajmee a'íi mu eetyú'uuca'aj i maj tajapuá tyí'huüre', ajta néijmi'que' puéertaj jitze sáij ajta sáij a'yaa pu tyé'yu'si'huaca'aj je'ej maj ántya'ruj a'íimaj i tyeítýeristyamua'me'en i maj hua' jitze eeráma'can a'íimaj i yójmua'mua' maj Israel jitze ajtyáma'can.

¹³ Huééicaj pu pua'maquéj a' puéertaca'aj a'ájna pujmua', jo'tij i xicáj jé'ejnyinyiij, ajta

huéicaj pua'maquéj ajtyapuáj pujmua', a'yaa pu ajta huéicaque' tyá'pueertaca'aj áatyej pu-jmua', ajta huéicaque' a'ájna pujmua' jo'tij i xicáj ja'ancáru'pij.

14 Ajta tamuáamuata' japuan hua'puaj i tyetyéj ataquéetime i ti japuan ájtaavijhuaca' i ti jin curiá'nami' i chájta'naj, a'íj pu'íj jitze á'yu'si'ij je'ej maj ántya'ruj i maj tamuáamuata' japuan hua'puaj ará'asej, i cánya'aj ti hua'antyíhuoj.

15 Ajta a'íjna i ti tajapuá tyí'huiire' ti nyajamuan tyí'xajtaca'aj, a'íi pu tyi'tíj iityéchooca'aj ti'íj ciyéj ti ooroj jin taavijhuaca'aj, a'íi pu a'íin pué'een i ti jin jaatyé'iten a'chu tij ve'éj i chájta'naj, ajta a'chu ti antayóhuaj i puéertaj, ajta a'chu ti ájtyeej i ti ájtaavijhuaca'.

16 Ajta i chájta'naj juxa'aj pu huatátyeevi'ca'aj, a'chu ti huatátyeej a'yaa pu cha'tána'aj ooyóhuaj. Ajta i ti tajapuá tyí'huiire' a'íi pu jaatyé'itej i chájta'naj a'íjna jime' i ciyéj, hua'puaj ví'ra'aj quilometroj pu huatátyeej i chájta'naj, a'yaa pu cha'tána'aj aantayóoj, ajta a'yan cha'tána'aj ájtyeevi'ij.

17 Aj pu'íj té'ej jaatyé'itej a'íjci i ti ájtaavijhuaca', a'yaa pu'íj ájtyeej huéecatyej japuan anxíviij meetroj pu ájtyeej, ajta a'íjna i ti tajapuá tyí'huiire' a'yaa pu tyetyé'itej mat'íj tyá'mua'reej i tyétyacaa.

18 Ajta i jáxu'uj tyetyéj pu jin ájtaavijhuaca' maj a'yan jatamuá'muaj tijin diamante, ajta néijmi'i i chájta'naj, ooroj pu jin taavijhuaca'aj, ajta a'yan tya'tátaave'ej ti'íj i jájtya'huaa.

19 Ajta i ti atátaavijhuaj i ti japuan ájtaavijhuaj

i ti jin curiá'nami' i chájta'naj, naa pu tyámua' tyí'taavijhuaca'aj a'íjna jime' i tyetyéj ti huápu'i'ij naa huasé'rin, anaqueéj pu a'íjna i tyetyéj ti a'yan ántyapuj tijin diamante, ajtáhua'aj síij i zafiro ti puíríci, ajta a'íjna i ágata ti tyetyéj pué'een ti síichira', ajta a'íjna i tyetyéj ti huá'raa esmeralda ti ántyapuj,

²⁰ ajta a'íjna i ónice ti yú'xare', ajta a'íjna i cornalina ti po'vij, ajta i crisólito ti tyóomuara', ajta a'íjna i berilo ti cí tyí'tyoomuara', ajta a'íjna i topacio ti naa tyí'tyoomuara', a'íjna crisoprasa ti naa tyí'tyoomuara' ajta cí tyi'hua'raa, ajta a'íjna jacinto ti nacámuaa, ajta a'íjna i amatíista ti naa tyí'nyeeri'ij.

²¹ A'íjna i puéertaj ti tamuáamuata' japuan hua'puaj ará'asej, a'íj pu jin taavijhuaca'aj i peerla. Ajta néijmi'i i cáayej ooroj pu jin taavijhuaca'aj ti a'yan tyí'tatzaj ti'ij i jájtya'huaa.

²² Nyajta quee tyeyúuj a jo'séj, i chájta'naj jitze, ji'nye a'íjna i tavástara', i Dios ti néijmi'i jin antyúumua'ree, a'íi mu a'íin pué'een i tyeyúuj, ajta a'íjna i cánya'aj.

²³ Ajta a'íjna jitze i chájta'naj, capu juxie've' ti i xicáj huá'tatzavi'tya'aj nusu i máxcirie', ji'nye a'íi pu jin i Dios huányeeri'ij, ajta a'íjna i cánya'aj, a'íi pu a'íin pué'een i tatzárij.

²⁴ Majta a'íimaj i tyeítyee a'íi mu nyéeri'iste' ciinyej muá'ju'un i chájta'naj jitze, majta a'íimaj i maj tyihuá'ijtye' i maj a'yan huacháatimee i cháanacaj japua, a'íi mu tyu'tátuiire'sij i maj jin chíjtyaanyi'taca'aj.

²⁵ Camu a'náj tye'tyánasij jo'tij ja'pueertaj i

chájta'naj jitze, ajta quee a'náj huatíca'aj ta'mej,
²⁶ a'íj mu jimi tyu'tátuiire'ej néijmi'i i maj
 tyí'ijcha'íj i maj va'cán jin tyityatatyíj, majta i
 maj jin huápuí'íj naa huasé'rihua'aj,

²⁷ ajta quee a'náj tyi'tíj ti xána'vi're' utyárutyij
 u chájta'naj jitze, nusu a'tíj ti je'ej pua'aj
 tyi'tyúucha'íj, nusu i ti tyú'cuanamuaj. Sulu a'íi
 mu'uj i maj á'yu'si'íj i yú'xaria'ra' jitze i cánya'aj
 i ti hua'tá'caa mej mij jusén jin júurij.

22

A'íjna i játya'naj ajta i ciyéj ti a'áa já'sejre'

¹ A'íjna i ti tajapuá tyí'huiire' pu játya'naj
 naataséjraj ti naa éenye'ej muí'yej, ajta a'íjna
 i jájtyij júuricamej pu tyu'tá'caa. Naa pu
 tyí'me'estij i jájtyij tí'ij i cristal, ajta a'áa
 je'rányajcaa jo'tíj jo'tyéjvee i ipuárij ti jitzán
 acájca i Dios, ajta a'íjna i cánya'aj.

² Ajta a'áa jé'ta' je'cámuí'yaca'aj i cáayej jitze,
 ajta juxa'aj i ciyéj tye'ejtyaváatima'caa jo'tíj
 joo'ástimee i jájtyij, a'íi pu a'íin pué'een i ciyéj i
 maj jin júurij muá'ra'nyij, tamuáamuata' japuan
 hua'puaj pu pua'máj tajcaria'aj séej nyinyi'ra'aj
 jitze, ajta i xámue'ra', a'yaa pu tyí'huiire' mej
 mij a'íjna jin tyihuó'huaatye'en a'íimaj i maj séej
 chuéj japua jo'cháatimee.

³ Capu che' tyi'tíj séeria'aj ta'mej ti je'ej pua'aj
 huó'uurej. A'íjna i ipuariáara'an i Dios ajta i
 cánya'aj, a'íi pu séeria'aj ta'mej i chájta'naj jitze,
 mej mij i tyeítyeristyamua'me'en jaatyáanajche.

⁴ A'íi mu jaséeraj muá'ju'un, ajta huá'cuatze'
 séeria'aj ta'mej je'ej ti a'íin ántyapuaj.

⁵ Capu a'náj huatyática'rij a'ájna, majta a'íimaj i maj a'áa ja'chej, capu che' hua' jitze juxié'va'aj ta'mej i tatzárij, nusu i xicáj, ji'nye a'íi pu tavástara' i Dios hua'tátzavi'raj ja'mej, majta a'íimaj mu tyí'íitaj muá'ju'un jusén jime'.

⁶ Aj pu'ij a'yan tyinaaté'exaaj a'ájna i ti tajapuá tyí'huíire' tíjin:

—A'íi pu i nyúucarij tzáahuatyi'ra'aj jin séejre' ajta ji'récán jime'. A'ájna i tavástara' i Dios, a'íi pu a'yan tyihuo'tá' i ju júuricamej a'íijma i maj jitzán ma'can tyí'xajtaca'aj, a'íi pu'ij ajta nyéetzij nyojo'ta'ítyaca' nyej nyij tyihuo'taséjratye'en a'íijma i maj jahuíire' i Dios je'ej ti jiye'tzín atyojo're'nyesij.

⁷ —Jiye'tzín nu uvé'nyesij!

¡Che' huatóotyamua've'en a'ájna i ti ja'astej je'ej ti tyé'yu'si' a'íjci i yu'xarij jitze!

⁸ Nyáaj, Juan, nyáaj nu jáanamujri' nyajta jaaséj je'ej ti tyé'yu'si' a'ájna jitze i yu'xarij. Ajta nyati'íj a'yan tyáanamujri', nyajta a'yan tyu'séj, aj nu nyij jimi tyítunutaca' a'íjci i ti tajapuá tyí'huíire', nyej nyij jaatyáanajche.

⁹ Ajta a'ájna a'yaa pu tyinaaté'exaaj tíjin:

—Capáj a'yan rijcaj, ji'nye nyáaj nu nyajta jahuíire' i Dios, a'yájna pati'íj muáaj, ajta mati'íj majta a'ihuáamua' i maj Dios jitze ma'can tyí'xajtaca'aj majta néijmi'i a'íimaj i maj a'yan ricij je'ej ti tyé'yu'si' a'íjci jitze i yu'xarij. Pata'aj a'íj huatyáanajchej i Dios.

¹⁰ A'yaa pu ajta tyinaaté'exaaj tíjin:

—Capáj ja'avaataj i nyúucarij ti á'yu'si'ij a'íjna jitze i yu'xarij, ji'nye pu'ríj atyojo're'nyesij a'ájna xicáara' ti jitzán néijmi'i tye'entyipúa'rij.

11 Ajta a'íjna i ti je'ej pua'aj tyi'tyúucha'ij, che' ooj je'ej pua'aj tyi'tyúucha'íij, ajta i ti xána'vi're', che' ooj xána'visi' séjre'ej, ajta i ti ji'réenye'ej séejre' i Dios jimi, che' ooj tyámua' tyí'sejria'aj.

12 —A'yaa pu tyi'ja'yájna, nyáaj nu jiye'tzín uvé'nyesij, nyajta jaa'á'sima'aj na'mej je'ej ti síij tyi'tíj jin huaríj.

13 Nyáaj nu a'íin pué'een i ta'nájcaj, nyajta i nyaj uvé'tyajtíj, nyajta a'íin pué'een i nyaj jájcuaj ímuáj huaséjre, nyajta jusén jime' séeria'aj na'mej, nyáaj nu anaquéej huataséjre ti'ij quee xu tyi'tíj séjria'ca'aj, nyajta nu a'íin pué'een i nyaj néijmi'i tya'ancuriáa'sij ti'ij tye'entyipúa'rej íjij ti tyí'sejre'.

14 Miche' huatóotyamua've'en a'íimaj i maj tyi'jo'sicaa i tyúucaanaa ti'ij a'yan tyihuó'ci'tiyí maj jáacua'nyij i táque'ra' i ciyéj i maj jin júurij huatyá'itzeere'en, mej mij majta a'áa jo'tyájrutyey jo'tíj ja'pueertaj i chájta'naj.

15 Majta apua'quéj mu jo'tyá'itzeere'ej i maj je'ej pua'aj tyityetyúucha'íij, majta i maj tyi'chahuaaraj, majta i maj juxana'cire', majta i maj tyi'tyacui'caa, majta i maj saanturij na'michej majta néijmi'i i ti a'yan tyihua'ráanajchi i ti hue'tzij pué'een, mej mij a'náj tina'aj tyi'hue'taj.

16 —Nyáaj, Jesús, nyáaj nu jaata'ítyaca' ja'mua jimi a'íjci i ti nyahuíire' ti'ij tyajamuaté'exaatye' mua'ajmaj mu siaj jusi'rii i tyeyúuj tzajta'. Nyáaj

nu a'íin pué'een i nyaj David jitze eeráma'can. Nyáaj nu a'íin pué'een i xú'ra'vej ti eeré'nyinyii tapuá'risima'caj.

¹⁷ Ajta i júuricama'ra' i Dios, ajta i ti oochán huatyéevichej i cánya'aj, a'yaa mu tyí'xaj tijin:

—Mupo've'me'.

Ajta i ti iityánamuaj, che' ajta a'yan tyu'taxáj tijin:

—Mupo've'me'.

Ajta i ti í'mu'uj, ajta jaxie'va'aj ti huaye'en, che' mujo've'me'en ajta je'en huáapua'aj jaayé'en i jájtyij i ti jin júurij huatyá'itzeere'ej.

¹⁸ Ajta néijmi'i i maj janamuaj je'ej ti tyé'yu'si' a'íjci jitze i yu'xarij Dios jimi ti já'ma'can, tipua'aj seequéj tyaataxáj, Dios pu puéjtzij jaatá'sij a'yájna ti'ij tyé'yu'si' a'íjci jitze i yu'xarij.

¹⁹ Ajta tipua'aj a'tíj je'cácaa jóo'uunaj i ti tyé'yu'si' i yu'xarij jitze, Dios pu jáa'ri'raj i ti jaci'tyij ti jáacua'nyij i táque'ra' i ciyéj ti jin júurij já'ra'nyij, ajta quee che' jaci'tyij ti a'áa jo'tyájrutyey i chájta'naj jitze ti naa een, a'yájna ti'ij tyé'yu'si' i yu'xarij jitze.

²⁰ Ajta i ti a'íjna jin a'yan tyí'xaj, a'yaa pu tyí'xaj tijin:

—A'yaa pu tyi'ja'yájna, nyáaj nu jiye'tzín uvé'nyesij.

Che' a'yan tyá'ra'nyij. ¡Mupo've'me' tavástara' Jesús!

²¹ Che' a'íjna i tavástara' i Jesús, che' a'íin tyámua' néijmi'caa mua'ajmaj tyajamuáacha'íin.

Cora, Santa Teresa
Cora, Santa Teresa: I nyúcarij ti jájcua ti a'ijna
á'xaj i Tavástara' i Jesús ti Ciriistu' pue'een ajta
Salmos New Testament+

copyright © 2016 Wycliffe Bible Translators, Inc.

Language: Cora, Santa Teresa

Contributor: Wycliffe Bible Translators, Inc.

All rights reserved.

2025-05-01

PDF generated using Haiola and XeLaTeX on 30 Apr 2025 from source
files dated 1 May 2025

4f03662f-a4e0-5c7c-a13b-0b7002b5b8f6